

Mak

Jon Naan Igunēdiya Tamo Naab Dodok Fenen (*Matyu 3:1-12; Luk 3:1-18; Jon 1:19-28*)

- 1** ¹ Jesus Kristus, Negur Naal nigin, biya od gariya inoya.
² Profet Asaia nē itotoya bun ibodok:
“Aya neu arū tamo ī ket sur afe di, ī uyu ilauf,
ogon naab dodok fouf.”^a
³ “Ait taka gerere tuan iweig irok,
‘Odug nē naab dodok ge fen,
madur wenēg.’”^b
⁴ Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin. ⁵ Judia kalilī fiya, Jerusalem tamo kayau ganan, ī garan dilen. Idi neid mosor kurō difesi di, idi im Jordan naanū naan igunēdin. ⁶ Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. Ī totobi nin te ado yōdig. ⁷ Ei enī yogon od iron, “Taka ī aya dumeun dō fyauf, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sã.”^c ⁸ Aya naan nem aguneik, anī ere, ī Awa Uur Fateulem iguneif.”

Jesus Naan Igun Ado Ī Bun Kisi Fiya Wō Yen (*Matyu 3:13–4:11; Luk 3:21, 22; 4:1-13*)

⁹ Sain anī bun, Jesus Nasaret taun oun Galili nediwom isi, Jonem Jordan naan igunen. ¹⁰ Jesus naanum fã yale fen, ī lof mog, saa tano kãf fen, Awa Uur kuburir gen, ī bun isi mog, ilen. ¹¹ Age fe di, ait taka saa ilunem isin, “Ō neu Kesu, ō nigin aya wau laa fedig, ō nigin aya wau kulī yedig.”

¹² Kaisã bagai, Awa Uurem sur fiyē di, gerere tuan ilen. ¹³ Ī gerere tuan an, naa foti ibod mog, Satanem kisi fiyen. Ī gaar kuī geid difar mog, engel idim anī Ī disennen.

^a 1:2 Malakai 3:1 ^b 1:3 Asaia 40:3 ^c 1:7 Juda neid tobonunã anī, sain tamo yana ado isi di, idi neid kabī tamo in ye su nē malū biru difedig.

Jesus Nē Dō Fiya Tar Uyulil Iweignēdin

(Matyu 4:12-22; Luk 4:14, 15; 5:1-11)

¹⁴Jon kalabus bun dinenen ibod mog, Jesus Galili ile, Negur nē biya od anī kurō feis iron. ¹⁵Ī iron, “Sain mogo isil. Negur nē tano mogo melsak. Wauī falei wog fen, biya od enī nigin wauī momoi gei!”

¹⁶Jesus Galili maaī yeri iyo ken, ĩ Simon, ne tura Endru ado, daliyou bun kakāg dirā mog, ileidin, ere nigin, idi gau yaleya tamo. ¹⁷Jesus iron, “Usig, dō wiyag, aya ā tamo gei fiya nigin aneyeif.” ¹⁸Sain anī bun bai, nedi kakāg ditor ken, ĩ dō difiyen.

¹⁹Sain ĩ naal iyok ile fen, ĩ Sebedi naal Jems, tura Jon ado, waag namen, idi neid kakāg dodok dife mog, ileidin. ²⁰Kaisā bagai, ĩ iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneid fen, Jesus dō difiyen.

Jesus Kaa Sane Irun

(Luk 4:31-37)

²¹Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon. ²²Tamo kayau in od nigin terē den, ere nigin, ĩ tamo yana adom gen ifelnēdin, ĩ lo ifelnēdiya tamo gen sā. ²³Agef mog bai, tamo taka kaa sanem irounen anī, nedi uub fō namen an kaī ye iron, ²⁴“Ō amā ere naig wamā fenē, Jesus Nasaret tamal? Ō amā daig wamā fenē nigin usil de? Aya ō nigin keleī, Negur nē Fateul bagai!”

²⁵Jesus total ado iron, “Foro wol! Ī namen tamal ulō weis!” ²⁶Kaa sane, tamo anī total bagai yokū fiyē, sur fiyē, ira ken, kaī ye, ulō yesin.

²⁷Tamo kayau ganan terē de fen, abob toti difen, “Eī ere? Keleī mata, agef fen, total ado! Ī irō di, kaa seseneg dō difedig.” ²⁸Ī age fen anī nē od kaisā bagai, Galili kalilī fiya fonō anī adok iyokelen.

Jesus Musei El Fedin

(Matyu 8:14-17; Luk 4:38-41)

²⁹Sain Juda neid uub fō ditor ken, kututū desin, idi Jems Jon ado weim, Simon Endru ado neid fō bun dilen. ³⁰Simon nē mam, ĩ bouwa uruwa odug ado nigin fatarē yenen, anī idi ĩ nigin Jesus dirokenen. ³¹Anī nigin, Jesus kayau wagen ile, kayau ima yales irou isennē di, fā yen. Age fe di, bouwa uruwa anī kayau folo fiye kele di, kayau ĩ aruneid yalen.

³²Aragau anī bun gaa kuru kel mog, tamo kayau dagi adodo, kaa sesen adodo ganan, Jesus wagen guri difeid, disin. ³³Taun anī nē tamo kayau ganan, fofomala anī bun guru difen. ³⁴Anī bun, Jesus, tamo kayau dagi fire fire adodo musei el fiyēdin, kaa sesen musei irudi di, diyawon. Anī ere, kaa sesen idi ĩ nigin kelein. Anī nigin, idi to wogō douf nigin sigoreid ifofan.

Jesus Moilin Negur Kosē Fiyen
(Luk 4:42-44)

³⁵ Bonimeï bagai mumurei ado, Jesus fā yale, fō itor, moilin ile, an Negur kosē fiyen. ³⁶ Simon ĩ, ne tā tar geid dimirne ken, dilen. ³⁷ An fotou difiye ken, idi dirokenen, “Tamo kayau ganan ō dimirnok!”

³⁸ Jesus aitedin yale iron, “Ada uyu takā talauf, fonō melsā anī bun. Aya aneg od arōf, anī nigin aya asin.” ³⁹ Age ye fen, Jesus Galili kalilī fiya ganan bun iyo ken, nedi uub fō fō bun od iro ken, kaa sesen irudi di, diyawon.

Tamo Taka Lepra Dagi Ado
(Matyu 8:1-4; Luk 5:12-16)

⁴⁰ Tamo taka lepra dagi ado, ĩ wagen isi, ibor bobou fe fen, igon, “Ō royoŋ are, el wiyauf.”

⁴¹ Jesus wau gudūf fen, ima irā, kobū fiye ken, ĩ iron, “Aya wau irok, ō bouwā biyaf!” ⁴² Age ye di, kaisā bagai lepra guruma ĩ itornē di, bouwa biya len.

⁴³ Jesus kaisā bagai totol bagai weder irou fen, sur fiyē di, ilen: ⁴⁴ “Karī welei, enī aib taka to urokenēf, anī ere, ō pris wagen ule, ō bouwā ufehnēf, ō bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.” ⁴⁵ Anī ere, ĩ iyok ile fen, kurō feis irō di, od anī iyokelen. Anī nigin, Jesus mal atun taun taka bun to iledig, ĩ moilin ibodon. Anī ere, tamo kayau firen firen temeleid fau fau ĩ wagen disidig.

Jesus Tamo Bouwa Ilolaisin Anī El Fiyen
(Matyu 9:1-8; Luk 5:17-26)

2 ¹ Naa tunī bure fele di, Jesus baban Kapenaum taun ile di, tamo kayau idi, ĩ fō taka bun ibodok yeya anī karī den. ² Anī nigin, tamo kayau musei guru difen, fō aaben ado fofomala dino dale di, modoū san. Age dife di, Jesus od irokenēdin. ³ Jesus od irokeneid mog, tamo tunī tamo ilolaisin anī tamo aiwa ifenēyam faali de, dirou disin. ⁴ Idi ĩ Jesus garan irou ileyā kisi feleya sã, ere nigin, tamo kayau musei, anī nigin, idi Jesus ibodok nē fō soko anī korō difel fen, tamo gabgab bun yen mog, folo folō dife di, isilen. ⁵ Jesus idi neid momoiya ile fen, ĩ tamo ilolaisin irokenen, “Kesu, ogon mosor alelkonok.”

⁶ Age fe di, lo ifelnēdiya tamo tunī an dibodon, idi dogo namedin kisi difen, ⁷ “Ere nigin ĩ age irok? ĩ kono fef! Taka nem mosor yaleleya to yenek, Negur yogo dogol.”

⁸ Kaisā bagai, Jesus yogon kisi bun, idi waudim kisi difen anī kelein. Agef fen, ĩ idi irokenēdin, “Ā ere nigin agog kisi gef? ⁹ Tamo ilolaisin anī

irokenēya nigin nanī anī karika, ‘Ogon mosor alelkonok’ de, ‘Fā wo, ogon gabgab wale fen, uyok ule?’ ¹⁰Anī ere, Tamo Naal ī tenebur ein mosor yaleleya nigin yana ado anī, ā kelei youf nigin...” Age ye fen, ī tamo ilolaisin anī irokenen, ¹¹“Aya ō arokonok, fā wo, ogon gabgab wale fen, fō bun ule.” ¹²Ī fā yale, ganan meleid bun in gabgab yale iyok ilen. Age fe di, tamo kayau ganan terē de fen, Negur yana dales diron, “Ada kulu ereb eig fiya taka to tailen!”

Jesus Lewi Iweignen
(*Matyu 9:9-13; Luk 5:27-32*)

¹³Jesus ī baban daliyou sirin ilen. Tamo kayau musei ī wagen disile di, ī od gariya ino ifelnēdin. ¹⁴Ī iyok ile, Lewi, Alfeus naal, takis yaleya fō bun ibod mog, ile fen, irokenen, “Aya dō wiya.” Age ye di, ī fā yale, dō fiyen.

¹⁵Jesus Lewi nē fō bun saaf yō mog, takis yaleya tamo musei, mosor adodo tamo kayau musei, ī, in dō fiya tar geid, weim saaf don, ere nigin, idi musei Jesus dō difiyen. ¹⁶Sain lo ifelnēdiya tamo, Farisia tamo idi, Jesus ī takis yaleya tamo, mosor adodo tamo kayau geid, weim saaf doko dibod mog, dileid fen, idi in dō fiya tar anī to difiyēdin, “Ere nigin ī takis yaleya tamo, mosor adodo tamo kayau geid weim doko?”

¹⁷Anī karī ye fen, Jesus idi iroknēdin, “Dagi sā anidim dokta bun ilya nigin waud to yenek, dagi adodom dogol. Aya madur tamo anidi iweignēdiya nigin to asin, mosor adodo tamo anidi iweignēdiya nigin asin.”

Kuri Nigin Jesus To Difiyen
(*Matyu 9:14-17; Luk 5:33-39*)

¹⁸Jon nē dō fiya tar, Farisia tamo geid, idi kuri den. Tamo tunī disi, Jesus to difiyen, “Naig fe di, Jon nē dō fiya tar, Farisia tamo nē dō fiya tar geid, idi kuri dedig, anī ere, ogon idi sā?”

¹⁹Jesus aitedin yale iron, “Naig fe di, mois tamo ibod mog, in tamo tar idi kuri douf? Idi to age difouf, ere nigin, ī idi geid fau dibodok. ²⁰Anī ere, naa fau isi di, anī bun mois tamo idi bun tamal yalelnē di, naa anī bun gama idi kuri douf.

²¹“Tamo taka, gabar tubu, gabar masak mata ado baguf fen, to iwauf. Taka ī age fouf are, masak mata anim tubu arirī fe di, tubu kudef irailauf. ²²Takag age fiya, taka nem wain mata meme gabar^d tubu bun to itinēf. Ī age fouf are, wain anim age fe di, meme gabar gē ye fen, serek fouf. Age fe di, wain meme gabar ado sane lauf. Age fiya nigin, ī wain mata meme gabar mata bun itinēf.”

^d 2:22 Juda neid tobonunā, idi meme gabar nem darum diwadig.

Jesus Ī Sabat Nē Odug
(*Matyu 12:1-8; Luk 6:1-5*)

²³Sabat naa^e taka bun, Jesus in dō fiya tar geid, wit kabī atu diyok dile fen, idi wit biya tunī fito difen. ²⁴Age dife di, Farisia tamo idi Jesus dirokenen, “Ulef, ere nigin idi Sabat naa nē lo difodul ken, Sabat naa bun oug difef?”

²⁵Jesus irokenēdin, “Sain Dawid, ne tā tar geid naū fedi di, saaf lau de fen, Dawid age fen anī, ā to uwesegen de? ²⁶Abiata, pris mudur ado ibodon sain anī bun, Dawid ĩ Negur nē fō namen ile fen, bret fateul prisem dogol dōdig^f an ibodon anī yokon, ĩ bret tunī, ne tā tareg ifenēdin.”

²⁷Age ye fen, ĩ idi irokenēdin, “Tamo isennēya nigin Sabat naa inon, tamom Sabat naa anī isennēf nigin to inon. ²⁸Anī nigin, Tamo Naal ĩ Odug, Sabat nēg ĩ Odug.”

Tamo Taka Ima Sitakā Gege Fefu Fiya
(*Matyu 12:9-14; Luk 6:6-11*)

3 ¹Sain taka, Jesus baban Juda neid uub fō bun ilen. Tamo taka ima sitakā gege fefu fen anī, an ibodon. ²Tamo tunī an difaren idi, Jesus bouwa bun od dinouf nigin naab dimiren, anī nigin, idi ĩ Sabat naa bun tamo anī el fiyē mog, dilouf nigin ololo difen. ³Jesus tamo ima fefu fiya anī irokenen, “Ganan meleid bun fā, ufar.”

⁴Age ye fen, Jesus idi to fedin, “Nanī anī Sabat naa bun lo dō fiya? Tobonunā biya age fiya anī de, tobonunā sane age fiya anī; isennē di, mata ibodōya anī de, yukesiya anī?” Anī ere, idi nin kē delen.

⁵Jesus seye ye fen, idi fele fedin, idi waud togun nigin, ĩ wau odug gudūf fen, tamo anī irokenen, “Ogon imā yaī wo.” ĩ yaī fe di, in ima oditekei biya len. ⁶Age fe di, kaisā bagai Farisia tamo idi kututū deis dile, Herod nē dō fiya tar weim, idi Jesus naig de dukesiyouf nigin od katō difen.

Tamo Kayau Musei Jesus Dō Difen

⁷Jesus in dō fiya tar geid, daliyoun disile di, tamo kayau musei Galili temeleid dō difen. ⁸Jesus ĩ ereb ereb ganan age fen anī karī de fen, tamo kayau musei Judia distrik, Jerusalem taun, Idumea distrik, Jordan naan kalilī fiya, Taia Saidon ado kalilī fiya adok, ĩ wagen disin. ⁹Tamo kayau museim Jesus to sile difiyēf nigin, ĩ yogon waag naal taka dodok de yenēf nigin, in dō fiya tar irokenēdin. ¹⁰Ere nigin, ĩ mogo musei el

^e 2:23 Sabat naa anī, Juda neid uub nē naa. ^f 2:26 Lo bun, bret fateul anī, prisem dogol dōdig.

fedin. Anī nigin, idi dagi adodo Jesus kobū fiya nigin abob susur difedin. ¹¹Kaa sesen Jesus dilef sain ganan, idi ī wagen kuku de, den ken, diweig dirōdig, “Ō Negur Naal.” ¹²Anī ere, Jesus, ī aib anī, to wogō douf nigin totol bagai katū fedin.

Jesus Aposel Tuwelf Igirnēdin

(Matyu 10:1-4; Luk 6:12-16)

¹³Jesus arei wala bun isel ibod ken, idi ī aib aib oron anī iweignēdin. Age fe di, idi ī wagen disin. ¹⁴Jesus ī tuwelf gei fen, aposel wowā douf nigin igirnēdin, are idi Jesus geid fen, dum biya od wogō douf nigin fau sur fediyouf, ¹⁵idi totol dale fen, kaa sesen dirudiyouf nigin age fen. ¹⁶Jesus tuwelf igirnēdin enidi, are Simon (Jesus ī yana yun Pita), ¹⁷Jems Sebedi naal, tura Jon ado (Jesus idi yeneid yun Boaneges, anī nē gariya, Kolimei Gere Tar), ¹⁸Endru, Filip, Batolomyu, Matyu, Tomas, Jems Alfeus naal, Tadeus, Simon Selot^g taka, ¹⁹Judas Iskariot, ī dum Jesus kiwai imeid bun inenen.

Jesus Belsebub Ado Difiyen

(Matyu 12:22-32; Luk 11:14-23; 12:10)

²⁰Jesus ī, fō taka bun ile di, tamo kayau musei baban guru difen. Anī nigin, Jesus in dō fiya tar geid, saaf yōya kisi feleya san. ²¹Jesus nē tura tar od anī karī de fen, idi ī dale diroulauf nigin dilen, ere nigin, idi diron, “Ī neneya kisi ado.”

²²Age dife di, lo ifelnēdiya tamo Jerusalem temeleid disi diron, “Ī Belsebub ado, ī kaa sesen neid mudur yana bunem, kaa sesen irudidig.”

²³Anī nigin, Jesus idi iweigneid fen, yaab od nem irokenēdin, “Satan ī naig Satan iruwauf? ²⁴Tano tekelei anī, yogo faraf, kiwai ifenēf are, tano anī to ifarauf. ²⁵Fō tekelei anī, yogo faraf, kiwai ifenēf are, fō anī to ifarauf. ²⁶Takag, Satan ī yogo faraf, kiwai ifenēf are, ī to ifarauf, in sain mogo bure felef. ²⁷Anī ere, taka nem tamo totol ado nē fō bun safina gei fou fenē, tamo totol ado ket ifokel fen, anī ī yogon fō bun bē yalouf. ²⁸Aya ā momoi arokeneik, tamo neid mosor ganan ado kono difef are, fau yalel kenēdiyof. ²⁹Ani ere, aibem taka Awa Uur Fateul kono fiyek, in mosor to yalelauf, in mosor anī faimud ibodkalauf.”

³⁰Jesus od enī iron, ere nigin, idi dirōdig, “Ī kaa sane ado.”

Jesus Nē Sina, Tura Tar Geid

(Matyu 12:46-50; Luk 8:19-21)

³¹Age ye di, Jesus nē sina, tura tar geid disin. Mayarē difar mā, idi Jesus dirokenēf nigin taka sur difen. ³²Tamo kayau musei ī salili difiyek dibodon, idi ī dirokenen, “Ogon sinā, turā tar geid, mayarē ō dimirnok.”

^g 3:18 Juda neid kusī mala taka, idi Rom gawaman ado kusī dedig.

³³ Jesus to fedin, “Ai anī neu naai, neu turau tar?”

³⁴ Age ye fen, ī, salili difiyē dibodon idi lo feid fen, ī iron, “Enidi anī neu naai, neu turau tar! ³⁵ Aib idi Negur nē oroya dō difedig anidi anī, neu turau, neu mainou, neu naai.”

Faat Irarāya Tamo Nē Yaab Od
(*Matyu 13:1-23; Luk 8:4-15*)

4 ¹ Jesus baban daliyou sirin, gariya ino, od ifelnēdin. Tamo kayau guru de, salili difiyen anī gai musei biya, anī nigin, tamo kayau adok ubun difar mog, ī waag taka daliyou ifaren anī namen isil ibodon. ² Agef fen, ereb ereb musei yaab od nem ifelneid fen, iron, ³ “Karī gei! Kabī marau taka faat irarāf nigin ilen. ⁴ Sain ī irarak ile mog, tunī naab luwen kuku ren, are ninā disi dakasin. ⁵ Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai. ⁶ Anī ere, sain gaa ise di, bali are ilalaid, laasi yedin, ere nigin, idi warumutei sā. ⁷ Faat tunī malū duri atun kuku ren, are malū duri anī fā ye fen, sile feledin, anī nigin, biya to yun. ⁸ Faat tunī teneub biya bun kuku ren, are idi fokū yedin, oduduge di, biya imadin, taka biya teti, taka biya siksti, taka biya wan hundred, age fef ilauf.”

⁹ Age ye fen, Jesus iron, “Taka ī kariya nigin weder ado, ī karī youf.”

¹⁰ Sain Jesus ī yogo ibod mog, yogon dō fiya tar tuwelf, tamo tunī salili difiyen anidi geid, yaab od nigin ī to difiyen. ¹¹ Jesus idi irokenēdin, “Negur tano nē waa are Negur mogo ifenein, anī ere, idi dumeitur onudi nigin, ereb ereb ganan yaab od bunem wogō yef, ¹² ere nigin,

“idi meledim diledig, anī ere, idi meleid fokōya sā,
idi wederedim karī dedig, anī ere, idi gariya keleī sā.

Age fiya sāf are, idi waud falei de di, mosor yalel kenēdiyof.^h”

¹³ Age ye fen, Jesus idi irokenēdin, “Ā yaab od enī wauī to fokō youf? Age fiyauf are, naig fe di, ā yaab od tunī nigin wauī fokō youf? ¹⁴ Faat irarāya tamo, biya od irarak. ¹⁵ Tamo tunī idi faat naab luwen kuku ren gen, an biya od iraran. Idi karī de mog, kaisā bagai Satan isi, biya od idi namedin iraran anī yaleledig. ¹⁶ Tunī idi faat meein tuar iraran gen, idi od anī karī de fen, kaisā bagai dale fen, waud bun kulī dedig. ¹⁷ Anī ere, idi warumutei sā, anī nigin, idi sain meluk to dibodōf. Sain, biya od nigin, morō be kafī fiya be isif, idi kaisā bagai dirofosis. ¹⁸ Tunig faat malū duri atun iraran gen, idi biya od karī den. ¹⁹ Anī ere, tenebur mata ibodōya nē sii fiya, safina ado ibodōya nē kisi fiya, oroya fire fire isif anidim, biya od sile fe di, anim biya to yūf. ²⁰ Tunī faat teneub biya bun iraran gen, idi biya od karī den, dale di, anī biya yūf, taka biya teti, taka biya siksti, taka biya wan hundred, age fef ilauf.”

^h 4:12 Asaia 6:9, 10

Lam Yoki Bun*(Luk 8:16-18)*

²¹Jesus idi irokenēdin, “Ā lam urou usig, beĩ kuren be fatar farumen unogouf de? Age fiya ban, ā lam yogon yoki bun to useginnēgouf de?
²²Ereb erob ganān iminēyan yenek anī ganān yaor fouf, erob erob ganān nar fen yenek anī ganān irou isi, biru fel fen, yaau du fouf. ²³Taka ī karīya nigin weder ado, ī karī youf.”

²⁴Jesus idi irokenēdin, “Ā od karī gef anī, ed ge kisi gouf, ā idi nigin kisi gef gen, ā niginēg age de kisi difouf, anī tobol feneif. ²⁵Aib taka ī ado, wal fiya ifenēf, aib taka ī sã, erob erob ī ado anīg ī bun yalelauf.”

Faat Odugef Nē Yaab Od

²⁶Takag Jesus iron, “Negur nē tano are eig fiya gen, tamo taka teneub bun faat irarak. ²⁷Bō ado gaa ado, tamo ī mulaĩ yenek, fã ye iyok, faat fokū ye fen, odugef, anī ere, ī naig be fe odugef, ī keleĩ sã. ²⁸Teneub yogo dogol biya inodig, uyulil bali, age fe di, turu, anī turu bun biya inodig. ²⁹Biya bure fele di, kaisã bagai ī dimig gunō waila ado inodig, ere nigin, biya yaleya sain isif.”

Masted Faat Nē Yaab Od*(Matyu 13:31, 32, 34; Luk 13:18, 19)*

³⁰Baban Jesus iron, “Negur nē tano, ere taka age fiya tauf? Ere bunem yaab tafouf? ³¹Ī masted faat age fiya. Ī faat memereis bagai ā teneub bun utenēgedig. ³²Anī ere, ī utenēge di, ī odugouf, ī kabier saaf ganān wal fediyouf, in beneir odudug irara ken, buri ino di, ninã ilun temeleid disi dibodōf.”

³³Jesus yaab od age fediya musei bunem, tamo kayau idi keleĩ youf kisin, od wogō fiyēdin. ³⁴Ī tamo kayau erob od irokenēdiyō fenē, yaab od bunem dogol. Anī ere, ī mugu yogon dō fiya tar geidef are, erob erob ganān faded fedidig.

Jesus Yau Uyē Ado Irokenēdi Di, Kee Delen*(Matyu 8:23-27; Luk 8:22-25)*

³⁵Naa anī bun aragau di, Jesus in dō fiya tar irokenēdin, “Ada daliyou sitakã talauf.” ³⁶Idi tamo kayau ditorneid fen, Jesus waag bun ibod mog, idi ī dale dirou dilen. Waag tunīg weim dilen. ³⁷Yau odug fã ye di, maaĩ fã ye, waag yu ken, maaĩ ifilege di, waag namen isokosen. ³⁸Jesus ī, waagibun edē bun mulaĩ yen mog, idi ī turī difiyē dirokenen, “Tise, ada naanū talalau fenē, ō to kisi walef de?”

³⁹Ī fã yen, yau sakã fiye ken, maaĩ irokenen, “Kee resig fen, dē weleg!” Age ye di, yau dē yele di, maaīg oditekei dē yelen.

⁴⁰Jesus in dō fiya tar irokenēdin, “Ere nigin ā kumī wogef? Ā fau momoiya sã de?”

⁴¹Idi fatuk bagai kumī tererē de fen, abob toti difen, “Eĩ aim bagai? Ī irō di, yau maaĩ adog ait dō difef!”

Jesus Tamo Taka Kaa Sesen Musei Ado El Fiyen

(Matyu 8:28-34; Luk 8:26-39)

5 ¹Idi naan daliyou dibal dile, Gerasa teneub bun wō den. ²Jesus waag bun tamal kutū yesi di, tamo taka kaa sane ado, matmat bunem ī fotou fiyē fenē isin. ³Tamo matmat bun ibodon anī, taka nem ī ifōya nigin kisi feleya sã, sen nemeg ifōya kisi feleya sã. ⁴Ī sain musei sen nem, ye ima ado difofädig, anī ere, ī sen kokour fel, yem ain weweur fedig. Taka nem totol ino fen, ī ifō di, dē yeleya kisi feleya sã. ⁵Sain ganan bō ado gaa ado, ī matmat atun ado areineg iweig kaĩ ye fen, meeinem yogo bouwa kokour fedig.

⁶Ī mala irakelen, Jesus gerom ile fen, gudu ref ile, Jesus wagen kubū ye, ibor bobou fen. ⁷Ī ait odug nem iweig iron, “Ō aya ere naig wiyau fenē, Jesus, Negur Ilun Bagai nē Naal? Negur yana nem aya ō agonok, ō aya to daig wiyauf!” ⁸Ere nigin, ī mogo kaa sane irokenen, “Ō tamo enī bun tamal ulō weis!”

⁹Age ye fen, Jesus ī to fiyen, “Ō yanā ai?”

Ī iron, “Aya yanau Ami, ere nigin, amā musei biya.” ¹⁰Jesus idi akor anī bun tamal to irudiyof nigin, ī baba baban Jesus igonen.

¹¹Melsā arei wala sirin, bor musei biya saaf doko difaren. ¹²Kaa sesen Jesus digonen, “Amā bor atun susur wamāf, yo wamā di, idi namedin malalau.” ¹³Jesus idi yo fedi di, kaa sesen ulolō deis disel, bor namedin dilelen. Bor, tu tausen age fiya, gududu de, bebeig sane baurin daliyoun disel, naanū gare desin.

¹⁴Bor lo fiya tamo diya dile, od anī taun ado fonō fonō wogō den. Age dife di, tamo kayau ereb wō yen anī dilou fenē dilen. ¹⁵Sain idi Jesus garan wō den, idi meleid dirā, tamo kaa sesen museim dirounen anī, an garab yel, kisi biya ado ibod mog, dilen. Anī nigin, idi kumī den. ¹⁶Tamo idi meledim dilen anidim, kaa sesenem tamo diroun anī ado bor age difen anī nigin, tamo kayau wogō difiyēdin. ¹⁷Age dife di, tamo kayau, Jesus ī idi neid teneub anī itor ilauf nigin digonen.

¹⁸Age de di, Jesus ī waag bun sō ye mog, tamo kaa sesenem dalen anī, Jesus ado dilauf nigin nonī fiyen. ¹⁹Jesus ī to awa yokon irokenen, “Ō fonō ogon ibor tar gedin ulauf, Odug ō nigin age fen anī ado, ī naig fe fen, ō nigin wau yun anī, idi urokenēdiyof.” ²⁰Age ye di, tamo anī itor ilen, Jesus ī nigin age fen anī, Dekapolisⁱ teneub bun tamo kayau wogō fiyēdi di, idi ganan terē den.

ⁱ 5:20 Anī nē gariya, Ten Taun.

Kayau Naal Laa Fen Ado Dagi Kayau Taka
(*Matyu 9:18-26; Luk 8:40-56*)

²¹Jesus baban waag bun ibal, naan daliyou sitakā ilen, ī daliyou yerin ibod mog, tamo kayau musei disi salili difiyen. ²²Age de mog, Juda neid uub fō lo fiya nē mudur taka, yana Jairus an isin. Ī Jesus ile fen, ī ye gariyan kubū yen. ²³Ī igone ken, irokenen, “Nau barai naal oboim fef. Uma fen, imā teten uno di, ī biyal, matauf.” ²⁴Anī nigin, Jesus ī uruwom dilen.

Tamo kayau musei dō difiyē, kitikiti de, susir difiyek dilen. ²⁵Kayau taka idi atun an ifaren, ogō dagi faimud ado yar tuwelf iyon. ²⁶Kayau anī dokta musei bun ilen, anī ere, bouwa bun morō odug idi bun yalen. Agef fen, yogon safina ganan irailen. Anī ere, kayau ī bouwa biya leya ban sane len. ²⁷Sain kayau ī Jesus nigin karī yen, ī Jesus dume dōf, tamo kayau atu ile, in kolos kobū fen, ²⁸ere nigin, kayau ī kisi fen, “Aya in gabar dogol kobū afouf, are deuf, aya fau biyauf.” ²⁹Kaisā bagai, kayau naud segē yelen. Age fe di, kayau ī yogo bouwa bun karī yen, are karika len.

³⁰Kaisā bagai, Jesus in total ī bun tamal ul fe yale mog, karī yen. Ī tamo kayau atun falei yel, to fedin, “Aim neu kolos kobū fel?”

³¹In dō fiya tar Jesus dirokenen, “Tamo kayau musei ō kiti diyok, ule fen anī, ō ‘Aim aya kobū fiyal?’ wof.”

³²Anī ere, Jesus ī aibem age fen anī ilouf nigin, fau fau fai yen. ³³Age fe di, kayau ī yogo ereb age fen kelei ken, Jesus wagen isi, ye gariyan kubū yen. Ī kumī tererē ye fen, momoi od ganan Jesus irokenen. ³⁴Jesus kayau irokenen, “Nau barai, ogon momoiya anim el yom. Waū nois ule, dagi anim to ifōyōf.”

³⁵Jesus fau od wogō ye mog, tamo tunī, Juda neid uub fō lo fiya mudur Jairus nē fō bunem disin. Idi diron, “Nē barai mogo laa fel. Ere nigin ō tise fau morō wenek?”

³⁶Jesus od idi diron anī idod ken, Juda neid uub fō lo fiya mudur anī irokenen, “To kumī wo, momoi dogol wo.”

³⁷Jesus ī takam dō fediya nigin katū fedin, Pita, Jems, ne tura Jon idim dogol. ³⁸Idi Juda neid uub fō lo fiya mudur nē fō bun ulō deis fen, Jesus mala iran, tamo kayau waud gudūf fen, inā legur mog, iledin. ³⁹Jesus aaben ile fen, idi irokenēdin, “Ere nigin ā fatuk bagai inaī gef? Kayau naal ī laa fiya sā, ī mulā yenek.” ⁴⁰Anī ere, idi Jesus kasā difiyen.

Age dife di, Jesus idi irud le fen, ī kesu nē sina tama ado, in dō fiya tar geid, kesu yenen nē namen dilen. ⁴¹Jesus ī imalē yalesne ken, irokenen, “Talita kum!” (anī nē gariya, “Kayau naal, aya ō arokonok, fā wo!”). ⁴²Kaisā bagai, kayau naal fā yale iyon (ī yar tuwelf ado). Anī nigin, idi oditekei terē den. ⁴³Anī ere, taka to diro ken, karī youf nigin, Jesus

total bagai katū fedin. Agef fen, ī kayau naal saaf difenē di, yāf nigin irokenēdin.

Profet Taka Fō Gariyan Yana Sā
(*Matyu 13:53-58; Luk 4:16-30*)

6 ¹Jesus an itor ken, in dō fiya tar geid yogon fō gariyan dilen. ²Sabat naa wō ye di, Jesus Juda neid uub fō bun ifelnēdiya gariya inon. Age fe di, musei ī karī difiye ken, terē de diron,

“Tamo enī ereb ereb enei nain gei fen? Eī ere keleī anī ī ifenen? Anī bunem ī memelikeg inodig. ³Ī to kapenta de? Ī to Maria naal fen, Jems, Josef, Judas, Simon ado tureid de? In main tar ada to ein weim de?” Age de fen, idi ī kiwai difenen.

⁴Jesus idi irokenēdin, “Profet taka ī, in fō gariyan, in sirag atun ado, in fō bun dogol, ī yana sā.” ⁵Ī an memelik taka inoya kisi feleya sā, anī ere, ī dagi tamo teke tekelei dogol ima tetedin ino fen, el fedin. ⁶Jesus idi neid momoia to ile fen, terē yen.

Jesus In Dō Fiya Tar Tuwelf Sur Fedin
(*Matyu 10:5-15; Luk 9:1-6*)

Agef fen, Jesus fonō fonō iyo ken, od ifelnēdin. ⁷Jesus tuwelf iweignēdi di, idi ī wagen disin. Ī uru uru, sur feid fen, kaa sesen dirudiyouf nigin, idi megeir ifenēdin.

⁸Ī fadim yu ken, iron, “Delē uyōgouf nigin ereb taka to walogouf, bret sā, kodol sā, moni sā, manig dogol. ⁹Sendel ufonūg fen, gabar ufilaigef dogol, taka to walogouf. ¹⁰Ereb sain ā fō bun ulagauf, an ubodōgef uleg, taun anī utorōgouf. ¹¹Fonō taka bun ā to daleyēi ken, ā to karī diyēif, sain ā fonō anī utorōg fen, yeī aas tu welege di, idi ā kiwai difenein anī keleif.”

¹²Tamo kayau waud falei youf nigin, idi dile, od wogō den. ¹³Idi kaa sesen musei diruid fen, tamo kayau dagi ado musei mouf diguneid, el difedin.

Jon Naan Igunēdiya Tamo Ula Gudū Difen
(*Matyu 14:1-12; Luk 9:7-9*)

¹⁴King Herod Jesus nigin od karī yen, ere nigin, Jesus nē yana fō fō ganan karī den. Tunī diron, “Jon naan igunēdiya tamo, ī laa bun tamal kel fā yen, anī nigin, memelik nē total ī bun kabī yalef.”

¹⁵Tunī diron, “Ī Eliya.”

Tunī diron, “Ī profet taka, profet kulu temeleid taka gen.”

¹⁶Anī ere, sain Herod od enī karī ye fen, ī iron, “Jon, tamo anī ayam ula gudū afen, ī laa fen anī kel fā yen!”

¹⁷Ere nigin, kulu Herod ī irō di, Jon dale difo ken, kalabus bun dinenen. Are Herod yogo tura Filip nē kayau Herodias yalen nigin,

¹⁸Jon Herod irokenēdig, “Ō turā nē kayau son won, are lo ufodulen.”

¹⁹Herodias Jon nigin name sane fen, ī dukesiyouf nigin wau iron. Anī ere, ī kisi feleya sã, ²⁰ere nigin, Herod Jon kumī fiye ken, ī, Jon anī madur fateul tamo ye fen, kulatun fedig. Sain Herod ī Jon nē od karī yedig, ī wau togudig, anī ere, ī in od karīya nigin orodig.

²¹Dum sain biya wō yen, Herod ī sina gō fen anī nē naa bun, in kabī tamo odudug, in kusī mudur adodo, Galili teneub bun uyu irouya tamo anidi nigin tar inon. ²²Sain anī bun, Herodias nē barai isi, seg kui ye fen, dole di, Herod in tamo tar geid waud al fen.

Anī nigin, king kayau momoul irokenen, “Ereb taka nigin waū iro ken, to wiyauf, are ō afonōf.” ²³Age ye fen, ī wau adok kuturol fen, kayau momoul irokenen, “Ereb taka nigin ō to wiyauf, aya neu tano anī fara af, uru afe fen, sitakā ifonōya kisin anī afonōf.”

²⁴Kayau momoul ile, sina irokenen, “Ere bagai nigin aya to afiyēf?”

Sina iron, “Jon naan igunēdiya tamo nē mudur nigin.”

²⁵Ī kaisā bagai ile, king irokenen, “Aya gama bagai Jon naan igunēdiya tamo nē mudur, beī bun uno wanauf anī orouf.”

²⁶King ī wau togun bagai, anī ere, in wau kuturol fen, tamo kayau meleid bun mogo iron nigin, ī kayau nē od yaleleya itoron. ²⁷Anī nigin, king kaisā bagai ula gudū fedig kabī tamo, Jon nē mudur yale irou isiyouf nigin sur fiyen. Age fe di, ī ilen, kalabus bun Jon ula gudūf fen, ²⁸mudur anī beī bun ino irou isin, kayau momoul ifenē di, ī bam yale, sina ifenen. ²⁹Jon nē dō fiya tar anī karī de fen, disin, in bouwa dale, matmat bun mū difen.

Jesus Faif Tausen Tamo Saaf Ifenēdin
(*Matyu 14:13-21; Luk 9:10-17; Jon 6:1-14*)

³⁰Aposel idi Jesus wagen guru de fen, idi ereb age difen ado difelnēdin anī adok, wogō difiyen. ³¹Age de mog, tamo kayau musei dilef disif difen, anī bunem, idi saaf yōya kisin san. Anī nigin, Jesus idi irokenēdin, “Ā aug dogol usig, aya geid talauf, modoū taka motikeleyan an si tanouf.”

³²Anī nigin, idi dogo dogol waag dale diya, moilin dilen. ³³Anī ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowā den.

³⁴Sain Jesus wō ye fen, mala iran, tamo kayau musei iledin, ī idi nigin wau yun, ere nigin, idi sipsip marau sã gen. Anī nigin, ī ereb ereb musei idi ifelnēdin.

³⁵Sain anī bun, gaa mogo kuru kelen, anī nigin, in dō fiya tar ī garan disi diron, “Eī gerere tuan, sain mogo sa kelel. ³⁶Tamo kayau susur wodi di, dilauf, ago di, idi fonō kalilī fiya fonō fonō dile fen, dogo yōya nigin saaf na gei difouf.”

³⁷Anī ere, ī aitedin yale iron, “Idi dāf nigin ereb āgem wenēdigouf.”

Idi ī dirokenen, “Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenēdi di, dāf de?”

³⁸Jesus idi irokenēdin, “Bret ganī ā ado? Uleg ulogouf.”

Idi kelei ken, Jesus dirokenen, “Bret faif, gau uru ado.”

³⁹Age de di, Jesus, tamo kayau ganan, mala fire fire, fisir biya bun dibodadāf nigin, in dō fiya tar irokenēdin. ⁴⁰Anī nigin, idi mala bun dibodadan, tunī wan handred, wan handred, tunī fifti, fifti. ⁴¹Jesus bret faif gau uru ado yale, saa ilun itad fen, ī Negur de fiye ken, bret mumā fen. Agef fen, ī in dō fiya tar ifenēdin, tamo kayau wagedin dinodiyouf nigin. Ī gau urug agef tamo kayau atun foif ifenēdin. ⁴²Idi ganan don kisi felen. ⁴³In dō fiya tar, tamo kayau bret gau ado dokon, tunī ditoraran anī fito difen, karam tuwelf isokosen. ⁴⁴Faif tausen tamo anidim bret don.

Jesus Naan Teteatu Iyon (Matyu 14:22-33; Jon 6:15-21)

⁴⁵Kaisā bagai, Jesus, in dō fiya tar waag bun, idi ketem Betsaida dilauaf nigin, sur fedin. Agef fen, ī tamo kayaug irudin. ⁴⁶Jesus idi itorneid fen, Negur kosē fiyēf nigin arein iselen.

⁴⁷Aragau mog, waag daliyou atun ifaren, anī ere, Jesus ī yogo mugu teneub bun. ⁴⁸Jesus in dō fiya tar total bagai ful dife mog, iledin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. Ī wal fediyou fenē age fen. ⁴⁹Anī ere, sain in dō fiya tar meleid diran, Jesus daliyou teteatu iyō mog, dile mā, idi kisi baraū de fen, idi ui guri den, ⁵⁰ere nigin, idi ganan ī dile fen, kumī tererē den.

Kaisā bagai, Jesus idi irokenēdin, “Totol unog! Are ayam. To kumī wog.” ⁵¹Age ye fen, ī idi gedyouf nigin waag bun sō ye di, yau kee relen. Idi oditekei terē den, ⁵²ere nigin, idi bret bun waud to fokō yen, idi neid waud katī felen.

Jesus Genesaret Oun Dagi Adodo El Fedin (Matyu 14:34-36)

⁵³Idi sitakā dibabal dale, Genesaret teneub bun wō de fen, an waag difokel difaren. ⁵⁴Idi waag bunem kututū deis mog, tamo kayau enei Jesus yeya idi kelein. ⁵⁵Idi Jesus an ibodok yeya karī def are, idi fonō anī kalilī fiya adok gududu de fen, dagi tamo gabgab ado guri difedi di, disin. ⁵⁶Sain ganan, modoū fire fire bun, Jesus ilen, fonō fonō, taun tunī, taun dumeitur, tamo kayau idi maket modoū bun dagi tamo dinenēdin. Idi yogon gabar iri kobū difouf nigin Jesus nonī difiyen. Ganan idi ī kobū difen, dagi fara feledin.

Amuyē Sā Amuyē Ado (Matyu 15:1-20)

7 ¹Farisia tamo, lo ifelnēdiya tamo tunī geid, Jerusalem temeleid disi guru de fen, Jesus salili difiyen. ²Idi lo difeid mog, in dō fiya

tar tunī amuyē ado imeid kulo fiya sã saaf don. ³ (Farisia tamo ado Juda tamo kayau ganan, saaf kaisã to dōdig. Idi imeid ket kulo difel fen, saaf dāf, ere nigin, idi mudur adodo biyeid neid tobonunã dō difedig. ⁴ Idi maket bun tamal ke douf, idi saaf kaisã to dāf, idi imeid kulo de fen bagai. Idi tobonunã musei tunīg dō difedig, kap, darum, ketel kulo fiya age fiya.)

⁵ Anī nigin, Farisia tamo, lo ifelnēdiya tamo geid, Jesus to difiyen, “Ere nigin on dō fiya tar, mudur adodo biyeid neid tobonunã to dō de fen, amuyē ado imeid kulo fiya sã saaf dōdig?”

⁶ Jesus idi irokenēdin, “Asaia ī, ā mala yaleya tamo nigin wogō yen, in od tutuk, are eig ye itoton:

“Tamo kayau enidi neid sigoredim aya selu kulō difedig,
anī ere, idi waud aya nigin gerō ifaref.

⁷ Idi aya yanau dalesedig, are ege.

Idi tamo nē lo dogol anī difelnēdidig.’^j”

⁸ Jesus idi irokenēdin, “Ā Negur nē itāfiya utorōg fen, tamo nē tobonunã anī urougef.”

⁹ Age ye fen, ī idi irokenēdin, “Ā augeneī tobonunã dō fiya nigin ge fen, ā Negur nē itāfiya anī weleī sirin inoya keleī bagai! ¹⁰ Ere nigin, Moses iron, ‘Ō sinã tamã yeneid wales,’^k ‘Aibem taka sina tama ado yeneid sane inouf, ī laa bun dineyēf.’^l ¹¹ Anī ere, ā urōgedig, tamo taka sina tama ado nigin irōf, ‘Ereb taka ā isenneīya nigin ayam ifeneīya, anī Koban’ (anī nē gariya, ‘ayam Negur afenem’), ¹² anī bunem, ā ī sina tama baban isennēdiya nigin katū wiyēgedig. ¹³ Anī nigin, tubuī tar neid tobonunã anī waleg uroug fen, Negur nē od tadū gedig. Agog fen, ā tobonunã fire fire musei agog gedig.”

¹⁴ Jesus baban tamo kayau iweignēdi di, wagen disi di, iron, “Ā adok aya karī wiyag, enei keleī youf. ¹⁵ Safina serē tamal tamo namen isilef anim, tamo amuyē to ifenēdig, anī ere, erab taka tamo namenem wō yef anim, ī amuyē ifenēdig.”^m

¹⁷ Jesus tamo kayau itorneīd fen, fō bun ile di, in dō fiya tar, yaab od enī nigin ī to difiyen. ¹⁸ Jesus idi irokenēdin, “Āg fatuk nene gef de? Ereb taka serē tamal tamo namen isiledig anim, amuyē to ifenēdig anī, ā to ulegedig de? ¹⁹ Ere nigin, safina are tamo wau bun to iledig, anī ere, te namen isiledig, anenem bou dōf isil, ulō yesidig.” (Age ye iron anī bunem, Jesus kurō feis, saaf ganan amuyē sã yen.)

²⁰ Ī od tobol fe fen, iron, “Ereb tamo namenem ulō yesef anim, ī amuyē ifenēdig. ²¹ Ere nigin, tamo waud bunem kisi sesen wō yef, noli tobonunã,

^j 7:7 Asaia 29:13 ^k 7:10a Eksodas 20:12; Diuteronomi 5:16 ^l 7:10b Eksodas 21:17; Levitikas 20:9 ^m 7:15 Itotoya tunī eig de ditoton: *ifenēdig*. ¹⁶ Taka ī karīya nigin weder ado, ī karī youf.

bē, tamo yukesiya, seseirā inoya, ²²neu mugu yeya, tobonunā sesen, idegēya, noli kisi, kiyēī, ne tā bou yūya, aya aya yeya, neneya tobonunā. ²³Tobonunā sesen enei ganan, tamo namen tamal ulō yesef anim, tamo amuyē ifenēdig.”

Sirofonisia Kayau Taka Nē Momoiya
(*Matyu 15:21-28*)

²⁴Jesus fonō anī itor ken, Taiaⁿ teneub bun ilen. Ī fō taka aaben ile fen, taka nem ĩ an ibodok yeya to keleī youf nigin wau iron. Anī ere, ĩ iminkel ibodōya nigin kisi feleya sā. ²⁵Agef mog, kayau taka Jesus nigin od karī yen, ĩ, ne barai kaa sanem irounen anī isi fen, Jesus ye gariyan kubū yen. ²⁶Kayau anī ĩ Grik^o kayau, ĩ Siria nediwon Fonia an sina gō fen. Ī, kaa sane, ne barai bun tamal iruwauf nigin Jesus nonī fiyen.

²⁷Jesus kayau irokenen, “Kesu nanaal idi ereb orodif anī, idi ket dāf, ere nigin, kesu nanaal neid bret yale, gaū irarakenēdiya, are to biya.”

²⁸Kayau anī solof iron, “Odug, are momoi, anī ere, gaū idig, tebol farumen kesu nanaal neid saaf momout kuku re di, dōdig.”

²⁹Age ye di, Jesus kayau irokenen, “Ago solo urok nigin, ō ule, kaa sane, nē barai mogo itornem.”

³⁰Age ye di, kayau fō bun ilen, kaa sane, ne barai itornen anī, fatarē yen mog, ilen.

Jesus Tamo Taka Weder Sigor Ado Ifofakeleya El Fiyen

³¹Jesus Taia teneub itor ken, Saidon teneub atu ilen, Dekapolis^p teneub bun wō ye fen, Galili maaīwō isilen. ³²An tamo kayau, tamo taka weder daabu leya tutuk wogōya kisi feleya sā anī, Jesus wagen dirou disin. Idi tamo anī bun, ima teten inouf nigin Jesus nonī difiyen.

³³Jesus, ĩ tamo kayau atun yale, firen irou ile fen, in ima gege, tamo anī nē weder kur inodin. Agef fen, Jesus salina ira ken, tamo anī nē bale kobū fen. ³⁴Jesus saa ilun itad fen, si odug yale fen, ĩ irokenen, “Efata!” (anī nē gariya, “Fokō weid!”). ³⁵Kaisā bagai, tamo nē weder fokō yedin, in bale karika le di, ĩ od atata fel wogō yen.

³⁶Jesus, taka irokenēya nigin idi katū fiyēdin. Ī baba baban irokenēdin, anī ere, musei wogō def dilen. ³⁷Tamo kayau idi odug biya terē de fen, idi diron, “Ī ereb ereb ganan biya dogol age fen. Ī age fe di, weder daabuya karī yef, sigor ifokeleya wogō yef.”

ⁿ 7:24 Taia are taun taka. ^o 7:26 Grik, idi ibor fire, Juda sā. ^p 7:31 Anī nē gariya, Ten Taun.

Jesus Fo Tausen Tamo Saaf Ifenēdin
(*Matyu 15:32-39*)

8 ¹Sain anī bun, baban tamo kayau musei guru difen. Idi ereb taka yōya nigin san, anī nigin, Jesus in dō fiya tar ī garan iweig laisi fen, irokenēdin, ²“Aya tamo kayau enidi waud inaf, idi mogo aya geid, naa towo ereb taka yōya sā. ³Aya idi naū ado fonō susur afouf are, idi luwen kuku douf, ere nigin, idi tunī egerō temeleid disin.”

⁴In dō fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

⁵Jesus to fedin, “Bret ganī ā ado?”

Idi diron, “Sewen dogol.”

⁶Jesus tamo kayau tenebur dibodadāf nigin irokenēdin. Agef fen, Jesus bret sewen geif iron, ī Negur de fiye ken, bret anī mumā feid fen, tamo kayau wagedin dinouf nigin, in dō fiya tar ifenēdi di, idi age difen. ⁷Idi gau nanaaleg teke tekelei adon. Ī gau anidi nigineg Negur de fiye ken, idi gadō difediyof nigin in dō fiya tar irokenēdin. ⁸Tamo kayau don kisi felen. Dum in dō fiya tar, tamo kayau bret dokon, tunī ditoraran anī fito difen, karam sewen isokosen. ⁹Tamo fo tausen age fiya an difaren. Anī Jesus idi, nedi fonō fonō sur fedi di, ke de dilen. ¹⁰Agef fen, Jesus in dō fiya tar geid, waag bun sosō de fen, Dalmanuta distrik dilen.

Farisia Tamo Saa Ilun Nē Uris Nigin To Difen
(*Matyu 16:1-4*)

¹¹Farisia tamo disi, Jesus kisi difiye ken, saa ilun nē uris dilouf nigin to difiyen. ¹²Ī si odug yale fen, iron, “Ere nigin tamo kayau sain enī bun difaref eneidi, uris nigin aya to difiyaf? Aya ā momoi arokeneik, uris taka idi to dalouf.” ¹³Age ye fen, ī idi itorneid, waag bun kel sō ye, maaī sitakā ibal ilen.

Farisia Tamo Geid Herod Geneid Yis
(*Matyu 16:5-12*)

¹⁴In dō fiya tar bret taka to dalen, wedereid tu kelen. Bret tekelei dogol waag bun idi adon. ¹⁵Jesus idi wedereid iron, “Ā, Farisia tamo geid Herod geneid yis nigin lo welegei.”

¹⁶In dō fiya tar idi dogo dogol katō de fen, diron, “Ada bret sā nigin age yel.”

¹⁷Idi neid wogōya Jesus kelei ken, idi to fedin, “Ere nigin ā bret to rougel nigin wogō gef? Ā fau ileya sā, wedereī fokōya sā de? Āgenei wauī total bagai lef de? ¹⁸Ā meleī ado, anī ere, ā to ulegedig de? Ā wedereī ado, anī ere, ā to karī gedig de? Ā to karī welegef de? ¹⁹Sain aya bret faif, faif tausen tamo nigin mumā afen, ā karam ganī bun, bret tunī kuru ge di, isokosen?”

Idi aiten dalen, “Karam tuwelf.”

²⁰“Sain aya bret sewen, fo tausen tamo nigin mumã afen, ã karam ganĩ bun, bret tunĩ kuru ge di, isokosen?”

Idi aiten dalen, “Karam sewen.”

²¹Jesus idi irokenēdin, “Ã fau to kisi fokõ yef de?”

Tamo Taka Mala Ifofakeleya Oun Betsaida El Fiyen

²²Idi Betsaida disin. An tamo kayau tunĩ, tamo taka mala ifofakeleya diroule fen, Jesus imam kobũ fiyēf nigin nonĩ difiyen. ²³Jesus, tamo mala ifofakeleya ima yale, sibof, fonõ dumeitur dilen. Agef fen, ã tamo mala bun salina ira ken, ima tamo mala bun ino fen, to fiyen, “Ere tau ulef?”

²⁴Ã mala fara fel fen, iron, “Aya tamo kayau ailedif, idi aa gegen diyokesif.”

²⁵Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ganan ã yaor iledin. ²⁶Jesus tamo anĩ in fõ bun sur fiye ken, irokenen, “Fonõ atu to ulauf.”

Pita Kristus Nigin Kurõ Fesin

(Matyu 16:13-20; Luk 9:18-21)

²⁷Jesus in dõ fiya tar geid, Sisaria Filipai nediwon fonõ fonõ diyok dilen. Naabur ã to fedin, “Tamo kayau idi, aya nigin ai dedig?”

²⁸Idi diron, “Tunĩ dirok, Jon naan igunēdiya tamo; tunĩ dirok, Eliya; tunĩ dirok, profet anidi taka.”

²⁹Jesus to fedin, “Ba ã uleg? Aya nigin ã ai gef?”

Pita aiten yale iron, “Õ anĩ Kristus.”

³⁰Age ye di, Jesus ã nigin taka to dirokenēf nigin, idi wedereid iron.

Jesus In Laa Nigin Iron

(Matyu 16:21-28; Luk 9:22-27)

³¹Age ye fen, Jesus gariya ino, idi ifelneid fen, irokenēdin, Tamo Naal ã, darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ã dukesi di, naa towo bure fele di, kel fã youf. ³²Jesus od anĩ kurõ fesi di, Pita Jesus yale, yerin irou ile, ou fiyen.

³³Age fe di, Jesus falei yel, in dõ fiya tar lo feid fen, ã Pita ou fiyen. ã iron, “Satan! Dumeun ule. On kisi are Negur nē sã, on kisi tamo nē dogol.”

³⁴Age ye fen, Jesus, tamo kayau in dõ fiya tar geid iweigneid fen, irokenēdin, “Aib taka aya dõ fiyau fenē, ã yogon oroya lai fesil fen, yogon aa tetek faali fe, aya dõ fiyau. ³⁵Ere nigin, aib taka yogon bouwa buru mata ibodõf nigin oro fef, are fõ yalauf, anĩ ere, aib taka yogon mata bouwa buru, aya nigin ado biya od nigin ye fen, irailauf, are kel yalouf.

³⁶Tamo taka ã, teneub enĩ ganan kakarai fe, akorou ye fen, in malakanon

irailauf, ere biya ī yalouf? ³⁷Takag, tamo taka, yogon malakanon nigin ere mala solof fen, ī kel yalouf? ³⁸Aib taka, seseirā inoya,⁹ mosor inoya nē tamo kayau eneidi bun, aya nigin ado neu od nigin mama fouf are, sain Tamo Naal in engel fateul geid, Tama nē fula fiya medeīya ado disiyouf bun, īg ī nigin mama fouf.”

9 ¹Age ye fen, ī idi irokenēdin, “Aya ā momoi arokeneik, tunī ein difaref, fau to gare de mog, idi Negur nē tano^r megeir ado isi mog, dilouf.”

Jesus Bouwa Falei Felen
(*Matyu 17:1-13; Luk 9:28-36*)

²Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. ³In kolos lalau medeīya bagai, lalau anī tenebur ein taka nem kulo fe di, agef filiya kisi feleya sā. ⁴Agef mog, an idi meleid bun, Moses Eliya ado wowā de fen, Jesus weim wogō den.

⁵Pita Jesus irokenen, “Rabi,^s ada ein ibodōya nigin biya bagai. Ada salafat towo tanouf, taka ogon, taka Moses nē, taka Eliya nē.” ⁶(Ī wogōya tata fen, ere nigin, idi fatuk bagai kumī den.)

⁷Agef mog, lalo isi, idi kerub feid fen, ait taka lalo bunem wō yen, “Eī neu Kesu, ī nigin aya wau laa fedig. Ī karī wiyēg!”

⁸Kaisā bagai, idi fai den, aib taka to weim difar mog, dilen, Jesus dogol.

⁹Idi arei nem diyok disi fen, Jesus ereb idi dilen anī, Tamo Naal laa bun tamal fau fāya sā mog, taka to dirokenēf nigin, idi katū fedin. ¹⁰Idi od anī dogo bun dogol ibod ken, ‘laa bun tamal kel fāya’ anī nē gariya nigin katō difen.

¹¹Age de fen, idi Jesus to difiyen, “Ere nigin lo ifelnēdiya tamo, ‘Eliya ī ket uyu isi di, Mesia isiyouf,’ dedig?”

¹²Jesus aitedin yalen, “Momoi bagai, Eliya ket uyu isi fen, ereb ereb ganan madur fedif. Anī ere, ere nigin Tamo Naal ī darau musei yale fen, dudum difiyēf anī, Negur nē Itotoya bun ibodok? ¹³Anī ere, aya ā arokeneik, Eliya mogo isin, ī nigin Negur nē Itotoya bun yenek gen, ereb ereb ganan idi waud iron, ī nigin mogo age difen.”

Jesus Kesu Kaa Sane Ado El Fiyen
(*Matyu 17:14-20; Luk 9:37-43*)

¹⁴Sain idi, in dō fiya tar tunī ganan geredin disi fen, tamo kayau musei, idi salili difiyeid fen, lo ifelnēdiya tamo geid, od nem abob fe fe de

⁹ **8:38** Seseirā inoya, anī nē gariya ein, Negur fotokar waitou fire fire nigin momoiya.

^r **9:1** Negur nē tano an, Negur yogo ereb ereb ganan lo fef. ^s **9:5** Rabi, anī nē gariya, Juda neid tise.

mog, diledin. ¹⁵Kaisā bagai, tamo kayau ganan Jesus isi mog, dile fen, idi fatuk bagai terē den, aan difiyēf nigin gududu de dilen.

¹⁶Jesus idi to fiyēdin, “Ā ere nigin idi geid, od nem abob fe fe gef?”

¹⁷Guru fiya atun, tamo takam aiten yale iron, “Tise, aya neu kesu, ō gein arou asil, ī kaa sanem irou di, ait ifokelen. ¹⁸Sain ganan kaa sanem irouf, ī yū irā di, tenebur kubū ye, sali mokuf, gobora kikokō ye fen, bouwa teregein yedig. Aya on dō fiya tar kaa sane diruwauf nigin to afedin, anī ere, idi kisi feleya sā.”

¹⁹Jesus solof iron, “Tamo kayau eneidi momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun urousig.”

²⁰Age ye di, idi kesu anī, ī garan dirou disi di, kaa sane Jesus ile fen, kaisā bagai kesu yū iran. Kesu ī tenebur kubū ye, wele yef, yen ken, awa bun sali moku fen.

²¹Jesus kesu nē tama to fiyen, “Sain ganī ī eig fiya ibodon?”

Ī aiten yale iron, “Ī kesu naalun gariya inon. ²²Sain musei, ī yukesiyou fenē nigin yā bun ado naanū irādig. Anī ere, ō ereb taka age fiya nigin kisi feleyauf are, amā nigin waū ino ken, usennamā.”

²³Jesus ī irokenen, “‘Ō kisi feleyauf,’ wof de? Taka ī momoi youf, ereb ereb ganan age fiya nigin kisi feleya.”

²⁴Kaisā bagai, kesu nē tama iweig iron, “Aya momoi auf, neu momoiya naal nigin usenna!”

²⁵Age ye di, tamo kayau gududu de disi mog, anī Jesus ileid fen, ī kaa sane ou fiyen. Ī iron, “Ō daabuya ait ifokeleya kaa, aya ō arokonok, ī bun tamal ulō weis fen, baban ī namen to kel ulauf.”

²⁶Kaa anī ui ye fen, kesu yū irā di, fatuk bagai tererē ye mog, ulō yeis ilen. Lo difen, kesu laa gen yenē di, musei diron, “Ī laa fel.” ²⁷Anī ere, Jesus kesu anī ima irou fen, yalesnē di, ī ifaren.

²⁸Jesus ī aaben ile ibod mog, in dō fiya tar mugun ī to difiyen, “Ere nigin amā kaa sane iruya nigin kisi feleya san?”

²⁹Age de di, ī irokenēdin, “Eig fiya are, Negur kosē fiyēya^t bunem dogol iyawauf.”

Jesus Baban In Laa Nigin Iron (Matyu 17:22, 23; Luk 9:43-45)

³⁰Idi modoū anī ditor ken, Galili distrik atu diyok dilen. Taka nem idi an yeya kariya nigin, Jesus to oron, ³¹ere nigin, ī in dō fiya tar ifelnēdin. Ī idi irokenēdin, “Tamo Naal ī, fau kiwai tamo imeid bun dinouf. Idi fau ī dukesiyouf, naa towo bure fele di, ī fau kel fā youf.” ³²Anī ere, idi od enī nē gariya nene de fen, ī to fiya nigin kumī den.

^t 9:29 Itotoya tunī eig de ditoton: *kosē fiyēya ado kuriya.*

Ai Anī Odug Bagai?
(*Matyu 18:1-5; Luk 9:46-48*)

³³Idi Kapenaum taun disin. Jesus fō bun ibod ken, ī idi to fedin, “Ā naabur ere luwa urougel?” ³⁴Anī ere, idi foro firi delen, ere nigin, naab luwen, aim anī idi atun odug bagai ibodok nigin luwa diroun.

³⁵Jesus ibod ken, in dō fiya tar tuwelf iweig laisi fen, iron, “Taka ī uyu ifarau fenēf, ī gai dumen bagai youf. Agef fen, ī ganan neid kabī tamouf.”

³⁶Ī kesu naal taka yale iroule, idi atun ifarnen. Ī imam yale koboi fiye ken, ī idi irokenēdin, ³⁷“Aib taka aya yanau bunem, kesu naal eig fiya taka yalef are, ī aya yaleyaf. Aib taka ī aya yaleyaf are, ī aya dogol to yaleyaf, ī aya sur fiyan anīg yalef.”

Taka Ī Ada Nigin Kiwai To Inof, Are Neda
(*Luk 9:49, 50*)

³⁸Jon iron, “Tise, tamo taka, ō yanā nem kaa sesen iruid mog, amā mailen. Anī nigin, amā ī katū mafiyen, ere nigin, ī neda takam sā.”

³⁹Anī ere, Jesus iron, “To katū wiyēg, taka ī neu yanau nem memelik inof are, ī kaisā bagai aya nigin sane irōya kisi feleya sā, ⁴⁰ere nigin, taka ī ada nigin kiwai to inof, are neda. ⁴¹Aya ā momoi arokeneik, taka ī, aya yanau nem, ā Kristus nē nigin ye fen, kap naan ado ifeneif are, ī in mala solo momoi bagai yalouf.

Mosor Bun Ineyēf
(*Matyu 18:6-9; Luk 17:1, 2*)

⁴²“Aibem taka age fe di, kesu aya nigin momoi def enidi taka, mosor bun ineyēf are, tamo anī meein odug guyutu bun ifo ken, maaīwō irāyam, are dem. ⁴³Ogon imam mosor bun ineyōf, gudū wol. Ō imā tobega ado, mata bun ileya nigin biya bagai, ere nigin, ima totoū adouf are, hel bun an yā faimud ibodkeleyan uleya nigin.” ⁴⁵Age fiya gen, ogon yē anim, mosor bun ineyōf, gudū wol. Ō yē tobega ado mata bun ileya nigin biya bagai, ere nigin, yē totoū adouf are, hel bun dirāyōf.” ⁴⁷Takag, ogon malā anim, mosor bun ineyōf, ubodol uraile. Ō malā tekelei ado Negur nē tano bun ileya nigin biya bagai, ere nigin, malā totoū adouf are, hel bun dirāyōf, ⁴⁸an

“ ‘idi neid mamat to gare dedig,
yāg to gare feledig.’”^w

⁴⁹Tamo ganan, yā tetedin sol gen tu difouf.

^u 9:43 Itotoya tunī eig de ditoton: *nigin*, ⁴⁴ *an idi neid mamat to gare dedig, yāg to gare feledig.* ^v 9:45 Itotoya tunī eig de ditoton: *dirāyōf*, ⁴⁶ *an idi neid mamat to gare dedig, yāg to gare feledig.* ^w 9:48 Asaia 66:24

50 “Sol ī biya, anī ere, in kai sa kalauf, naig wo di, baban kai youf? Ā aug bun sol adouf, agog fen, abob nigin wau inosiya bun ubodōgouf.”

Tamo Kayau Ado Bagu Fiya Anī Fara Fiya

(Matyu 19:1-12; Luk 16:18)

10 ¹Jesus modoū anī itor ken, Judia distrik nē akor anī atu ile, Jordan naan sitakā ilen. Baban tamo kayau mala odug ī wagen disi di, ī gai age fedig gen, od ifelnēdin.

²Farisia tamo tunī disi, kisi difiye ken, to difiyen, “Tamo taka yogon kayau iruf anī, are lo dō fiya de?”

³Ā aitedin yale iron, “Moses, anī nigin ere od wogō yein?”

⁴Idi diron, “Moses yo yen, are tamo bagu fiya anī fara fiya pepa itot fen, kayau od sā iru di, ilauf, yen.”

⁵Jesus idi irokenēdin, “Moses lo anī itotkenein, ere nigin, āgenei wauī totol bagai agef yeneid. ⁶Anī ere, gariya bun Negur erēb erēb ino fen, ‘tamo ino, kayau ino fen.’^x ⁷Age fiya nigin, tamo ī in sina tama itorneid fen, in kayau ado bagu difouf, ⁸age fe di, idi uruwom bouweid tekelei youf.^y Age dife di, idi uru sā, idi tekelei. ⁹Anī nigin, erēb Negur bagu fedin anī, tamom to fara fouf.”

¹⁰Sain idi baban fō bun dibod ken, in dō fiya tar od enī nigin Jesus to difiyen. ¹¹Jesus idi irokenēdin, “Aib taka in kayau iru fen, kayau taka yalouf, ī kayau tubu morō ifen ken, seseirā inouf. ¹²Age fiya bagai, kayau taka in aiwa itorne ken, tamo taka yalouf are, ī seseirā inouf.”

Kesu Nanaal Jesus Geid

(Matyu 19:13-15; Luk 18:15-17)

¹³Tamo kayau, kesu nanaal Jesus wagen kobū fediyouf nigin guri difeid disin, anī ere, in dō fiya tar, idi ou difiyēdin. ¹⁴Jesus anī ile fen, wau sanen. Ā idi irokenēdin, “Utornēdig len, kesu nanaal aya wageun disiyouf, idi to katū wedig, ere nigin, Negur nē tano are eig fediya neid. ¹⁵Aya ā momoi arokeneik, aib taka ī, Negur nē tano kesu naal age fiya gen to yalouf are, ī namen to bagai ilauf.” ¹⁶Age ye fen, ī kesu nanaal koboi feid fen, in ima tetedin ino fen, el fiya ifenēdin.

Tamo Gaū Safina Musei Ado

(Matyu 19:16-30; Luk 18:18-30)

¹⁷Jesus mogo naab iyok ile mog, tamo taka ī garan gudu ref isel, wagen kubū ye, ibor bobou fe fen, ī to fiyen, “Tise biya, aya ere naig afouf anī, mata faimud ibodkeleya alouf?”

¹⁸Jesus ī irokenen, “Ere nigin ō aya anī biya wiyaf? Aibem taka biya sā, Negur yogo dogol. ¹⁹Ō itāfiya keleī: ‘Ō tamo taka to ukseyouf, ō to

^x 10:6 Jenesis 1:27 ^y 10:8 Jenesis 2:24

seseirã unouf, õ to bẽ walouf, õ taka nigin idegẽya od to urõf, õ idegẽya bunem safina to walouf, sinã tamã sigoreid dõ wouf.^z”

²⁰ Ì Jesus irokenen, “Tise, enei ganan, aya kesu naalun dõ afef asin.”

²¹ Jesus ì lof ile, ì nigin wau laaf fen, iron, “Tekelei anĩ õ inĩ sã. Ule, ogon safina ganan na nigin sur wo fen, maleg tamo weneid, agouf anĩ, õ saa ilun safina biya adouf. Ago wol fen, usi, aya dõ wiya.”

²² Od anĩ bunem, nawa kuru kele fen. Ì wau morõ ado ilen, ere nigin, ì safina musei ado.

²³ Jesus falei yel fen, in dõ fiya tar irokenẽdin, “Safina musei ado tamo, Negur nẽ tano bun ileyã nigin gai malai bagai!”

²⁴ In dõ fiya tar, in od anĩ nigin terẽ den. Anĩ ere, Jesus baban iron, “Nau kesu tar, Negur nẽ tano bun ileyã nigin gai malai bagai! ²⁵ Kamel ì gabar iwaya nil ku bun ileyã nigin karika bagai, safina musei ado tamo Negur nẽ tano bun ileyã nigin malai bagai.”

²⁶ Od anĩ bun, in dõ fiya tar fatuk bagai terẽ de fen, abob toti difen, “Age fiyauf are, aim anĩ mata ibodkeleya yaleyã kisi feleya?”

²⁷ Jesus idi lo feid fen, iron, “Tamo bun are kisi feleya sã, anĩ ere, Negur bun kisi feleya. Ereb ereb ganan Negur bun kisi feleya.”

²⁸ Pita Jesus irokenen, “Amã ereb ereb ganan mator ken, õ dõ mayok!”

²⁹ Jesus solof iron, “Aya ã momoi arokeneik, aib taka fõ, tura tar, main tar, sina, tama, gere tar be, kabĩ, aya nigin ado biya od nigin itoron, ³⁰ ì mala solo wan hundred wal fiya, sain enĩ bun, (fõ, tura tar, main tar, sina tar, gere tar, kabĩ anidi ado morõg) yalouf, ì dumen isiyouf buneg mata faimud ibodkeleya yalouf. ³¹ Anĩ ere, musei malabag dibodok, idi dumen dibodõf; musei dumen dibodok, idi malabag dibodõf.”

Jesus In Laa Nigin Irõ, Towo Fen (*Matyu 20:17-19; Luk 18:31-34*)

³² Jesus uyu irou fen, idi Jerusalem naab diselen. Age fe di, in dõ fiya tar idi terẽ de mog, idi dõ difedin anĩ kumĩ den. Baban Jesus in dõ fiya tar tuwelf firen gou feid fen, ì fau bouwa bun ere wõ youf anĩ irokenẽdin.

³³ Jesus iron, “Ada Jerusalem teselef, an Tamo Naal ì pris odudug, lo ifelnẽdiya tamo imeid bun dinenẽf. Idi ì laa fouf nigin bouwa bun od dũf. Age de fen, idi ì haiden Juda sã anidi imeid bun dino di, ³⁴ idi ketẽ difiyẽf, disisnẽf, wagĩ difiye ken, dukesiyouf. Naa towo bure fele di, ì kel fã youf.”

Jems Jon Ado Neid To Fiya (*Matyu 20:20-28*)

³⁵ Sebedi gere tar, Jems Jon ado, Jesus wagen disin. Idi diron, “Tise, amã ereb taka nigin to mafe di, õ agouf anĩ oromak.”

^z 10:19 Eksodas 20:12-16; Diuteronomi 5:16-20

³⁶ Jesus idi irokenēdin, “Ā ere anī, aya age afeneif nigin oroyeik?”

³⁷ Idi aiten dale diron, “Ogon fula fiya medeīya bun, amā taka ogon ima biyalē ibodō di, taka ogon ima kilē ibodōf anī oromak.”

³⁸ Jesus idi irokenēdin, “Ā ereb to gef anī nē gariya ā keleī sā, aya naan āf anī, ā yōya kisi feleya de? Agef mā, naan aya agūf anī, ā igūya kisi feleya de?”

³⁹ Idi aiten dale diron, “Amā kisi feleya.” Age de di, Jesus idi irokenēdin, “Naan aya āf are, ā wāgauf, naan aya agūf are, ā ugūgouf, ⁴⁰ anī ere, imau biyalē ibodōya, kilē ibodōya are, ayam ifenēya kisi feleya sā. Modou anidi are, idi nigin saika fen anidi neid.”

⁴¹ In dō fiya tar ten od anī karī de fen, Jems Jon ado nigin seye den. ⁴² Jesus idi iweig laisi fen, iron, “Ā keleī, haiden neid uyu iroya def anī, tamo kayau lo fiya nigin totol dinodig, idi dogo neid odudug, idi aruneid dalouf nigin megeir dinodig. ⁴³ Ā bun kisi to agef yenēf, ā atun, aib taka odug ibodōf nigin orof, ī āgenei kabī tamo ibodōf. ⁴⁴ Aib taka uyun ibodōf nigin orof, ī ganan neid ferfer ouf. ⁴⁵ Ere nigin, Tamo Naal ig disennēf nigin to isin, anī ere, ī tamo kayau isenneid fen, tamo kayau musei idi neid mosor anī fotokar, yogon mata ifenēdiyof nigin isin.”

Bartimeus Mala Ifofakelen Anī Mala Fara Felen

(Matyu 20:29-34; Luk 18:35-43)

⁴⁶ Age de fen, idi Jeriko disin. Jesus, in dō fiya tar, tamo kayau mala odug geid, taun anī ditor dile mā, tamo taka mala ifofakeleya, Bartimeus (Timeus naal), ī naab yerin nonī yef ibodon. ⁴⁷ Sain ī Jesus Nasaret tamal yeya anī karī ye fen, ī iweig iron, “Jesus, Dawid Naal, aya nigin malalon yō!”

⁴⁸ Age ye di, tamo musei sakā difiye ken, foro yalauf nigin dirokenen, anī ere, ī wade bagai iweig iron, “Dawid Naal, aya nigin malalon yō!”

⁴⁹ Jesus dē yel fen, iron, “Uweignēg.” Age ye di, idi tamo mala ifofakeleya diweignen, “Waū el fe fen, fā wale! Ī ō iweignok.” ⁵⁰ Age de di, ī yogon gabar sirilē iraille fen, fā yale, Jesus wagen isin.

⁵¹ Jesus ī to fiyen, “Aya ō ere age afonōf ani, ō oroyok?”

Tamo mala ifofakeleya iron, “Rabi, aya kelē au fenē.”

⁵² Jesus iron, “Ule, ogon momoiya anim el yom.” Kaisā bagai, ī kelē yel fen, Jesus dōf, naab dilen.

Jesus Tamo Yana Ado Gen Jerusalem Namen Ilen

(Matyu 21:1-11; Luk 19:28-40; Jon 12:12-19)

11 ¹ Idi Jerusalem kelē difiye ken, Moul Arei^a bun Betfage Betani ado wō den, Jesus in dō fiya tar uru sur feid fen, ² ī idi

^a 11:1 ‘Oliv Arei’ dedig.

irokenēdin, “Fonō wageik anī bun uleg, an wōg fen, donki naal difon anī ulogouf, are aibem taka anī bun to iyon. Anī biru weleg fen, ein urouf usig. ³Taka nem to yeif, ‘Ere nigin ā enī ago gef?’ youf are, urokenēgouf, ‘Odug orof nigin, fau mogo kaisā ein kel sur fouf.’”

⁴Idi dile, donki naal naabur bobog ileyen difokelen ifar mog, fotou difen. Idi biru de mog, ⁵tamo tunī an difaren anidim to difedin, “Ā ere naig gouf nigin, donki naal anī biru gef?” ⁶Idi Jesus irokenēdin kilei, solo de dirokenēdin. Age de di, tamo ditornēdi di, dilen. ⁷Idi donki naal anī Jesus wagen dirousi fen, idi neid gabar teten dirarā di, ī anī teten ibodon. ⁸Tamo kayau musei, idi neid gabar naabur du difedin, age de mog, tunī idi kabier aa were aarau ado kokour difedin anī du difedin. ⁹Tamo kayau yu dilen ado dume dō difen, kakaī de diron,

“Hosiana!^b”

“Odug yana bunem isif, are ī el fiyek!”^c

¹⁰“Neda tamada Dawid nē tano isif, are el fiyek!”

“Hosiana, ilun bagai!”

¹¹Jesus Jerusalem wō ye fen, tempel ilen. Ī ereb ereb ganan kii fedin, anī ere, sain bure felen nigin, ī in dō fiya tar tuwelf geid Betani dilen.

Jesus Aa Fig Isisnen

(*Matyu 21:18, 19*)

¹²We fele di, idi Betani ditor dile fen, Jesus naū fen. ¹³Ī mala ira kel, aa fig aarau ile fen, ī faat ado be ye mā, ilouf nigin ilen. Ī non ilen, faat taka to ilen, aarau dogol, ere nigin, imaya sain sā. ¹⁴Age fiya ile fen, ī aa irokenen, “Taka nem ō bun faat baban to yāf.” Agef irō mog, in dō fiya tar karī den.

Jesus Tempel Waī Fen

(*Matyu 21:12-17; Luk 19:45-48; Jon 2:13-16*)

¹⁵Jerusalem wō de fen, Jesus tempel modoū namen ile, na dale dile disi dife mog, an irudidin. Ī moni solo fediya^d neid tebol ado, kuburir na nigin sur fediya neid bens eleg feledin. ¹⁶Tamo ganan, tempel modoū bun safina na nē iroulediya nigin katū fiyēdin. ¹⁷Agef fen, Jesus ifelneid iron,

“Neu fō, teneub ganan nē kosēya fō douf,”^e

are Negur nē Itotoya bun to yenek de?

Anī ere, ā ‘bē tamo neid iminēya fō^f unogen.”

^b 11:9a Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. ^c 11:9b Sam 118:25, 26 ^d 11:15 Tempel takis inoya nigin, moni serē tamal ado tempel moni solo difedig. ^e 11:17a Asaia 56:7 ^f 11:17b Jeremaia 7:11

¹⁸Age ye di, pris odudug, lo ifelnēdiya tamo geid, od enī karī de fen, Jesus dukesiyouf nigin naab dimiren. Idi Jesus kumī difiyen, ere nigin, tamo kayau ganan in ifelnēdin anī nigin terē den.

¹⁹Aragau di, idi taun anī ditor dilen.

Aa Fig Gariri Kelen

(Matyu 21:20-22)

²⁰Bonimei idi naab diyok dile fen, idi aa fig warei bunem gariri kelen anī dilen. ²¹Pita weder fokō yel fen, Jesus irokenen, “Rabi, ulef! Ō aa fig usisin, are gariri kelen!”

²²Age ye di, Jesus solof irokenēdin, “Negur bun momoi wogei. ²³Aya ā momoi arokeneik, aibem taka arei enī irokenēf, ‘Ō kusu urā, maaīwō usil,’ age ye fen, ī wau to uru fen, momoi aya orok anī agef wō youf, youf are, agef dō fenēf. ²⁴Anī nigin, aya ā arokeneik, ereb taka nigin ā kosē bun tog fen, mogo malel ge, momoi gouf, are āgenei youf. ²⁵Sain ā ufareg kosēg fen, ā takan nē sane nigin wauī bun yenēf are, wedereī tu kalauf. Ago ge di, āgenei Temeī saa tanon ibodok, āgenei mosor nigin weder tu kalauf.”⁸

Jesus Aim Igirnen Anī To Difiyen

(Matyu 21:23-27; Luk 20:1-8)

²⁷Idi baban Jerusalem wō den, Jesus tempel fofomalan iyok ile mog, pris odudug, lo ifelnēdiya tamo, mudur adodo geid, ī wagen disin. ²⁸Idi Jesus to difiyen, “Ere igiriya bunem, ō ereb ereb enī ago wof? Aim ō enī agouf nigin igirnon?”

²⁹Jesus aitedin yale iron, “Aya to fiya tekelei afeneīf. Solog urokanage di, ereb igiriya bunem ereb ereb enī age afef anī, aya ā arokeneīf. ³⁰Jon naan igunēdin, are saa ilun tamal de, tamo bunem? Urokanag!”

³¹Idi dogo dogol katō de fen, diron, “Ada, ‘Saa ilun tamal,’ tauf, ī to fouf, ‘Age fe di, ere nigin, ā ī nigin to momoi gen?’ ³²Anī ere, ada, ‘Tamo bunem,’ tauf...” (Idi tamo kayau kumī difedin, ere nigin, tamo ganan, Jon ī momoi bagai profet den.)

³³Anī nigin, idi Jesus ait solo de diron, “Amā keleī sā.”

Age de di, Jesus iron, “Ayag ā to arokeneīf, ereb igiriya bunem aya ereb ereb enī age afedif.”

Tamo Kabī Lo Difedig Nē Yaab Od

(Matyu 21:33-46; Luk 20:9-19)

12 ¹Age ye fen, Jesus yaab od nem idi irokenēdin, “Tamo taka wain kabī yalen. Ī kau ifō kalī felen, wain sumin asi fiya nigin ku

⁸ 11:25 Itotoya tunī eig de ditoton: kalauf. ²⁶ Ā wedereī to tu kalauf are, āgenei Temeī saa tanon ibodok īg, āgenei mosor nigin weder to tu kalauf.

yalen, kabī lo fiya tamo neid fō inon. Agef fen, ī mala solo yalouf nigin wain kabī, kabī tamo tunī imeid bun ino fen, uyu takā ilen. ²Fito fiya sain, ī, kabī tamo taka, wain kabī lo fiya tamo gedin, wain biya tunī, idi bun gei foug nigin sur fen. ³Anī ere, idi ī dale, du ken, sur difiyē di, ima sāsā ilen. ⁴Age dife di, ī kabī tamo taka idi gedin sur fen. Idi tamo anī mudur bun du ken, mama difenē di, ilen. ⁵Ī baban takag sur fen, areg idi dukesin. Ī musei tunīg sur fedin, age fe di, tunī diden ken, tunī didenkesin.

⁶“Ī gama tekelei dogol sur fiya nigin ibodon, are yogo naal, ī yogon oboi bagai. Ī anī dumen bagai sur fiye ken, iron, ‘Idi neu kesu anī karī difiyēf.’

⁷“Anī ere, kabī lo fiya tamo, idi abob dirokenen, ‘Eī ī akorouf. Usig, ada ī tau keis fen, akor eī nedauf.’ ⁸Anī nigin, idi ī dale, dukeis fen, wain kabī dumeitur diran.

⁹“Age dife di, wain kabī marau naig foug? Ī isi, kabī lo fiya tamo idenkeis fen, wain kabī anī tamo tunī ifenēdiyof. ¹⁰Ā Negur nē Itotoya enī to uwesegen de?

“ Meein are fō inoya tamom sane de fen, ditoron,
meein anī gama monog tor wō yen,

¹¹ anī Odug yogo age fe di,
malamā yū yalen.^h ”

¹²Age ye di, pris odudug, lo ifelnēdiya tamo, mudur adodo geid, Jesus ironēya nigin naab dimiren, ere nigin, idi kelein, ī idi nigin yaab od wogō yen. Anī ere, idi tamo kayau nigin kumī de fen, idi ī ditornē dilen.

Sisa Takis Ifenēya (Matyu 22:15-22; Luk 20:20-26)

¹³Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin. ¹⁴Idi ī garan disi fen, diron, “Tise, amā keleī, ō momoi wogōya nē tamo. Ō tamom to wewu diyōdig, ere nigin, ō idi yeneid ado be, sā anī to es wedidig. Ago fen, ō momoi bagai Negur nē naab ufelnamādig. Sisaⁱ takis ifenēya nigin biya de, sā? ¹⁵Amā mafenēf de, sā?”

Anī ere, Jesus idi neid namedin kisi sane kelei ken, iron, “Ere nigin ā aya nigin kor unogef? Koin moni taka urousig len, aya ailau fenē.” ¹⁶Idi koin moni taka dirousi di, ī idi to fedin, “Eī ai nē malakanon? Eī ai yana nē itotoya?”

Idi aiten dale diron, “Sisa nē.”

¹⁷Age de di, Jesus idi irokenēdin, “Sisa nē are Sisa wenēg, Negur nē are Negur wenēg.”

^h 12:11 Sam 118:22, 23 ⁱ 12:14 Rom neid king odug.

Age ye di, idi ī nigin terē den.

Kel Fāya Bun Ai Nē Kayau Ibodōf
(*Matyu 22:23-33; Luk 20:27-40*)

¹⁸Sadusia tamo idi dirōdig, laa bun tamal to ke de fā dedig anī, Jesus wagen disi to difiyen. ¹⁹Idi diron, “Tise, Moses itotkanaman, are tamo taka laaf fen, aiwa itornen, anī ere, kesu sā, tamo ī waab anī yale fen, tura nē kesu diroukenēf. ²⁰Gama tura tura sewen dibodon. Matu ketem kayau yalen, anī ere, kesu yaleya sā mog, laa fen. ²¹Matu dō fiya bagam waab anī yalen, anī ere, īg kesu sā mog, laa fen. Idi dō fediyag de age fen. ²²Tura tura sewen anidi adok, kesu taka to dalen. Dum kayau areg laa fen. ²³Dum laa bun tamal kel fāya sain bun, ī ai nē kayau ibodōf, ere nigin, tura tura sewen anidi adok, ī dale dogolen?”

²⁴Jesus aitedin yale irokenēdin, “Ā od kū wenēgef, ere nigin, ā Negur nē Itotoya ado Negur nē megeir keleī sā. ²⁵Sain laa bun tamal kel fāya bun, an tamo kayau ado abob yalef ya sāf, idi engel saa ilun dibodok gen dibodōf. ²⁶Gama, laa bun tamal fāya nigin, Moses nē od Negur nē Itotoya bun ibodok, are arein aa mata bun fotou fiyen Negur ī naig fe irokenen, ‘Aya Abraham nē Negur, Isak nē Negur, Jakop nē Negur’^l anī to be uwesegen de? ²⁷Ī laa neid Negur sā, anī ere, ī mata ibodōya neid. Ā fatuk bagai kū wenēgef!”

Ītāfiya Odug Bagai Ganan Wal Fiya
(*Matyu 22:34-40; Luk 10:25-28*)

²⁸Lo ifelnēdiya tamo taka isi, idi od nem kusī de mog, karī fiyēdin. Jesus ī aiten, od biya irokeneid mog, karī ye fen, ī Jesus to fiyen, “Ītāfiya ganan bun, itāfiya nanī anī ganan wal fiya?”

²⁹Jesus iron, “Ītāfiya ganan wal fiya are enī, ‘O Israel, karī wog, Odug neda Negur, Odug ī yogo tekelei. ³⁰Ō, Odug ogon Negur ī nigin waū adok, malākanon adok, kisi adok, megeir adok bunem, ī nigin waū laaf.’^k ³¹Anī dō fiya are eig fiya, ‘Ō ogo nigin waū laa fef gen, nē tā nigineg ago waū laaf.’^l Ītāfiya uru enim, ganan wal fiya.”

³²Lo ifelnēdiya tamo anī Jesus irokenen, “Tise, ō de urok. Negur ī tekelei, taka to ibodok, Negur yogo dogol wof, anī bun momoi urok. ³³Ō Negur nigin waū adok, kisi adok, megeir adok bunem waū laaf fen, ō ogo nigin waū laa fef gen, nē tā nigineg ago waū laafei yeya anim, yā bun sesewi fiya ado sesewi fiya fire fire ganan wal fiya.”

³⁴Jesus tamo anī keleī ado aiten yale di, ile fen, Jesus ī irokenen, “Ō Negur nē tano nigin egerō sā.” Sain anī bunem ilen, taka nem baban to fiyēya nigin kumī den.

^l 12:26 Eksodas 3:6 ^k 12:30 Diuteronomi 6:4, 5 ^l 12:31 Levitikas 19:18

Ai Nē Kesu Anī Kristus?
(*Matyu 22:41-46; Luk 20:41-44*)

³⁵ Jesus tempel modoū bun ifelneīd fen, ī to fedin, “Naig fe di, lo ifelnēdiya tamo, Kristus ī Dawid nē naal dedig? ³⁶ Dawid ī yogo Awa Uur Fateul bunem wogō ye fen, kurō falaisin:

“Negur, neu Odug irokenen,
“Imau biya melem ubod mog,
ogon kiwai tar
on yē farumē gō afalauf.”’

³⁷ Dawid yogo, ī nigin ‘Odug’ yef, naig fe di, ī Dawid naal ouf?”
Tamo kayau musei waud el fiya ado karī difiyen.

³⁸ Jesus ifelneīd fen, iron, “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. ³⁹ Age de fen, idi Juda neid uub fō bun, sia biyai biyai bun dibod ken, tar inoya bun modoū malabag bun dibodōdig. ⁴⁰ Idi, kayau waab idegnēdiya bunem nedi fō sosoin de fen, meleid yaleya nigin meluk bagai kosē dedig. Tamo age fediya, mala solo sane bagai dalouf.”

Kayau Waab Nē Ofa
(*Luk 21:1-4*)

⁴¹ Jesus ofa moni bogis sitakā ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran. ⁴² Anī ere, kayau waab maleg taka isi, kapa koin moni giriya nanaal bagai uru inon. Are tu toea dogol.

⁴³ Jesus in dō fiya tar iweig laisi fen, irokenēdin, “Aya ā momoi arokeneik, kayau waab maleg enī ī, ganan wal fediya, odug bagai bogis bun inol. ⁴⁴ Idi ganan dogo neid safineid bun tamal tunī dinon, anī ere, kayau maleg anī, ereb ereb adok ī isennēf anī ganan inon.”

Idikeleya Sain Nē Uris
(*Matyu 24:1-35; Luk 21:5-33*)

13 ¹ Jesus ī tempel bunem kutū yeis mog, in dō fiya tar taka ī irokenen, “Ule, Tise! Ere meein odudug oug fediya! Ere fō meli meli oug fediya!”

² Age ye di, Jesus ī irokenen, “Fō odudug enī ganan uledif de? Meein enī taka to abob teten yenēf, anī adok fau isog irailauf.”

³ Jesus Moul Arein tempel sitakā ibod mog, Pita, Jems, Jon, Endru anidim mugun Jesus to difiyen, ⁴ “Ere sain enidi wō youf? Ere uris bagai anī, enī ganan kisi falauf nigin wō youf? Anī urokanamā.”

⁵ Jesus idi irokenēdin, “Takam idegneīya nigin lo weleg. ⁶ Musei aya yanau nem disi dirōf, ‘Aya Kristus,’ age de fen, musei didegnēdiyof.

7 Sain ā kusī nigin karīg fen, tamo sigoredim kusī nigin wogō douf anī karī gouf, ā to tererē gei. Ereb ereb anidi agef wō youf, anī ere, idikeleya sain fau dum isiyouf. 8 Teneub taka fā ye fen, ī teneub taka nigin kiwai ifenēf, tano taka ī, tano taka nigin kiwai ifenēf. Uyu taka taka bun mimī wō ye fen, naū isiyouf. Age foug anī, kayau kesu gō foug nigin darau gariya inodig age fiya.

9 “Ā aug nigin lo weleg. Ā fau kaunsel imeid bun dinenei ken, uub fō bun wagagā diyēf. Aya yanau nigin, ā gawaman mudur, king geid meleid bun ufareg fen, idi kurō walaisig urokenēdigouf. 10 Biya od ketem teneub ganan bun iyokalauf. 11 Sain ā gei diyēi ken, kot bun dirouleyēf, ere mauf wog fen, to kisi musei waleg. Sain anī bun, ereb ifeneik anī wogō gouf, ere nigin, are āgem to wogō gouf, are Awa Ur Fateulem.

12 “Turam, tura kiwai imeid bun ino di, dukesiyouf, age fe di, tamam in kesu age foug. Kesum sina tama kiwai difeneīd fen, laa bun dinenēdiyof. 13 Tamo ganan aya nigin ā kiwai difeneīf, anī ere, taka ī megeir ifaref ile ile idikeleyanouf, Negur ī yalouf.

14 “Sain ‘nimir anī fonou inouf nigin’^m ī an to ifarau nē anī ulogouf (anī uweseg, keleī youf), idi Judia distrik bun dibodok, arein diya diselauf. 15 Taka ī yogon fō agaran ibodok, ī kutū yeis, aaben ile, ereb ereb to yalouf. 16 Taka ī kabier ibodok, yogon gabar yalouf nigin to kel ilauf. 17 Naa anī bun, kayau bouweid ado, kayau kesu su difenēdif ado, idi meleidlon ado! 18 Feluk sain bun, anī to wō youf nigin, ā Negur kosē wiyēgouf, 19 ere nigin, naa anidi bun morō odug biya adouf, morō age fiya, gariya bun Negur teneub inon bunem isi gama, taka to wō yen, dum buneg taka to wō youf. 20 Odug morō odug nē naa anī to guru falaisim, taka to ibodom. Anī ere, tamo kayau ī igirnēdin nigin, ī naa anī guru falaisin. 21 Sain anī bun, taka ā irokeneīf, ‘Ulegef, Kristus yeir!’ oo ‘Ī your!’ ā anī to momoi ge. 22 Fau idegēya Kristus, idegēya profet ado, wō de fen, idi kisi falauf are, Negur igirnēdin anidi didegnēdiyof nigin uris memelik ado dinodiyof. 23 Anī nigin, lo welegei, sain anī fau mog, aya ā ereb ereb ganan arokenein.

24 “Anī ere, naa anidi bun, morō anī dō fiya,

“ ‘gaa gugum kalauf,
age fe di, ogō lalan to ifenēf,

25 saa ilun tamal barisa kuku rouf,
saa nē megeir ganan guyoyō douf.’ⁿ

26 “Sain anī bun, tamo idi, Tamo Naal lalo bun yogon megeir odug fula fiya medeīya ado isi mog, dilouf. 27 Agef fen, ī yogon engel susur fedī di, yogon tamo kayau igirnēdin anidi, teneub akor ganan bun, gaa iseya nem ile gaa ileyan, gei de, kuru difediyof.

^m 13:14 Daniel 9:27; 11:31; 12:11 ⁿ 13:25 Asaia 13:10; 34:4

²⁸“Gama ā, aa fig bun keleī walogouf. Susu bonuf fen, aarau inodif, ā keleī, saneya melsak. ²⁹Age fiya gen, ā ereb ereb anī wō youf ulogouf, ā keleī, are mogo melsā bagai bobogē ifaref. ³⁰Aya ā momoi arokeneik, tamo kayau sain enī bun dibodok eneidi to gare de mog, enī ganam wō youf. ³¹Saa teneub ado sa kalauf, anī ere, neu od to bagai sa kalauf.

Naa Sain Ado Takam To Keleī Youf

(*Matyu 24:36-44*)

³²“Taka nem naa sain ado to keleī youf, saa ilun engel idig sā, Naal īg sā, Dei yogo dogol. ³³Mata ubodōg fen, lo weleg! Ereb sain anī wō youf, ā to keleī youf. ³⁴Are tamo fō itor ileyā gen. Ī yogon fō itor ken, lo difouf nigin yogon ferfer imeid bun inon, idi mugu mugu kabī fire fire ifenēdin. Agef fen, ĩ tamo bobog bun anī mala inof ibodōf nigin irokenen.

³⁵“Anī nigin, mata ubodōg fen, lo welegei, ere nigin, ā keleī sā, ereb sain fō marau kel isiyouf, aragau be, bō atun be, tataro yū mog be, wef mog be. ³⁶Ī isi tarabā yeif, ā to wenēg mog, ileyēif, are deuf. ³⁷Ereb aya ā arokeneik, aya adok ganam arokenēdif, ‘Lo weleg!’ ”

Kayau Taka Betani An Jesus Mudur Bun Moul Fi Felen

(*Matyu 26:1-16; Luk 22:1-6; Jon 11:45-53; 12:1-8*)

14 ¹Gama Pasa naa ado Bret Yis Sā Sifa naa, fau uru yen mog, pris odudug, lo ifelnēdiya tamo geid, Jesus idegēya naab bun dale dirou fen, dukesiyouf nigin naab dimiren. ²Idi diron, “Sifa sain bun to age tafouf, age tafouf are, tamo kayau seye de fen, kusī dalesauf.”

³Jesus Betani an, Simon kulu lepra dagi adon tamo, in fō bun saaf yoko ibod mog, kayau taka ĩ wagen moul sumeī biya bagai moni odug nem, nad^o nem dogol dinon anī, gulub^p ado irou isin. Agef fen, kayau gulub anī karāf fen, Jesus mudur bun moul fi felen.

⁴Age fe di, tunī an difaren are waud sane fen, abob dirokenen, “Ere nigin moul enī sekil fef? ⁵Moul enei yar tekelei nē dimig mala wal feseya nem sur fiyam, agef fen, moni anī yale, maleg tamo ifenēdiyam, are dem.” Age de fen, idi ĩ total bagai ou difiyen.

⁶Jesus iron, “Uturnēg, ā ere nigin ĩ wau morō wenēgef? Kayau enī aya nigin biya bagai age fel. ⁷Maleg idi faimud ā geid ubodōgouf, anī nigin, ā idi isennēdiya oroyēif, are sain musei. Anī ere, aya faimud ā geid to tabodōgouf. ⁸Ī ereb age fiya kisin anī age fel. Ī moul aya bouwau bun fi felel are, mekur ainēf nigin anī ketem dodok fel. ⁹Aya ā momoi arokeneik, tenebur ein nain be, biya od enī wogō douf, ereb kayau enī age fel anīg wogō douf. Age fe di, idi ĩ nigin kisi difouf.”

^o 14:3a Fisir yana, fisir anī warumutei bun moul daledig. ^p 14:3b Meein alabasta nem dinon.

¹⁰Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen. ¹¹Pris odudug idi od enī karī de, waud al fe fen, ī moni difenēf nigin dirokenen. Anī nigin, ī Jesus idi imeid bun inouf nigin naab imirek ilen.

Odug Nē Saaf

(*Matyu 26:17-30; Luk 22:7-23; Jon 13:21-30; 1 Korin 11:23-25*)

¹²Bret Yis Sā Sifa inoya naa matu anī bun, sain anī are idi neid tobonunā, sipsip naal, Negur tubuid tar isennēdin anī kisi de fen, sesewi difedig anī, Jesus nē dō fiya tar Jesus to difiyen, “Ō amā nain anī Pasa naa nē saaf wāf nigin, amā dodok mafouf anī oroyok?”

¹³Age de di, Jesus in dō fiya tar uru sur feid fen, irokenēdin, “Taun uleg fen, tamo taka darum naan ado isi fotou yeif, ī dō gouf. ¹⁴Ī fō taka namen ile di, uleg fen, gama ā fō marau eig wiyēg urokenēgouf, ‘Tise to fel: Aya neu dō fiya tar geid, Pasa naa nē saaf māf nigin aab nain ibodok?’ ¹⁵Ī aab odug ilun anī ifelneif, an ereb ereb dodok de bure difelen. An neda nigin dodok gouf.”

¹⁶In dō fiya tar taun dile fen, Jesus iron kilei, ereb ereb age fiya dilen. Anī nigin, idi Pasa naa nē saaf dodok difen.

¹⁷Aragau di, Jesus in dō fiya tar tuwelf geid, an wō den. ¹⁸Idi tebol bun si dino, saaf dokon, Jesus iron, “Aya ā momoi arokeneik, ā atun takam aya kiwai imeid bun inoyauf, taka aya uruwom moko anim.”

¹⁹Idi waud gudūf fen, mugu mugu dirokenen, “Momoi bagai, ayam sā de?”

²⁰Jesus aitedin yale iron, “Ā tuwelf atun takam, taka ī, imamā uruwom beī bun nu mafef anim. ²¹Tamo Naal ī nigin ditoton agef bai ilauf. Anī ere, tamo ī Tamo Naal kiwai tamo imeid bun inof, ī malalon ado! Ī sina to gō fem, are dem.”

²²Idi saaf dokon, Jesus bret yale, Negur de fiye ken, bret anī mumā fen. Agef fen, in dō fiya tar ifeneid fen, iron, “Waleg, eī neu bouwau.”

²³Agef fen, ī kap yale, Negur de fiye ken, kap anī ifenēdin, age fe di, idi adok anī bun don.

²⁴Jesus idi irokenēdin, “Eī neu naudou, ā Negur geid bar itenēya nigin, are tamo kayau musei nigin fi felef, ²⁵aya ā momoi arokeneik, aya baban wain enī to āf, gaman ile, aya Negur nē tano bun wain mata āf bun.”

²⁶Idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(*Matyu 26:31-35; Luk 22:31-34; Jon 13:36-38*)

²⁷Jesus idi irokenēdin, “Ā fau adok uyalalagauf, ere nigin, Negur nē Itotoya eig ye irok:

“ ‘Aya sipsip marau aū di,

sipsip ganan firagagaũ difouf.’

²⁸Anĩ ere, aya kel fã auf bun, aya ket Galili uyu alauf.”

²⁹Pita Jesus irokenen, “Ganan diyalalaufeg, aya sãf.”

³⁰Jesus Pita irokenen, “Aya õ momoi arokonok, gama bõ enĩ bun, tataro kokorok ye uru fiya sã mog, õ ogo aya nigin wa wo, towo wouf.”

³¹Anĩ ere, Pita totol bagai iron, “Momoi aya õ uruwom gare taut nigin oufeg, aya õ nigin to bagai wa afouf.” Age ye di, idig ganan od de tekelei anĩ diron.

Getsemane Oun

(*Matyu 26:36-46; Luk 22:39-46*)

³²Idi modoũ yana Getsemane dedig, an dilen. Age de fen, Jesus in dõ fiya tar irokenẽdin, “Ein ubodõg mog, aya kosẽ auf.” ³³Ĩ, Pita, Jems, Jon anidi dogol geif fen, ĩ geid dilen. Agef fen, ĩ wau gũf fen, morõ odug gudũ fen. ³⁴Jesus idi irokenẽdin, “Neu malaukanon tobega le fen, wau morõ gudũ feis, laa nẽ daũ bun ifaref. Ein ufareg fen, lo weleg.”

³⁵Naal godof iroule fen, kisi falauf are, sain anĩ Jesus wal fiyẽf nigin, ĩ tenebur kubũ ye fen, kosẽ yen. ³⁶Jesus iron, “Aba,^q Dei, ereb ereb ganan, õ age fiya kisi feleya. Kap enĩ walelkana. Anĩ ere, neu oroya anĩ to dõ wo, on oroya dõ wo.”

³⁷Age fel fen, Jesus in dõ fiya tar gedin kel isin, mulã den mog, iledin. Jesus Pita irokenen, “Simon, õ wenek de? Õ aua tekelei to mata ubodõf de? ³⁸Ã, kisi yeiã bun to kubũ gouf nigin lo weleg fen, kosẽ gouf. Uur are orof, anĩ ere, bouwa anĩ malegef.”

³⁹Ĩ baban kel ile, uruwa kosẽ yen gen, dõf age fen. ⁴⁰Ĩ kel isin, baban denena mog, iledin, ere nigin, idi meleid morõ gudũ fesin. Idi ĩ ereb fiyẽya nigin taka to kisi difen.

⁴¹Jesus kel towo fe fen, in dõ fiya tar irokenẽdin, “Ã fau si unog fen, yenẽyai gef? Bure! Sain mogo isil. Ulegef, Tamo Naal mogo mosor tamo imeid bun ilef. ⁴²Fafãg fen, teleg! Kiwai imeid bun inoya tamo yeir isif!”

Jesus Dirounen

(*Matyu 26:47-56; Luk 22:47-53; Jon 18:3-12*)

⁴³Jesus fau wogõ ye mog, tuwelf anidi atun taka, Judas wõ yen. Tamo musei dimig adodo, seburer adodo, ĩ geid disin. Pris odudug, lo ifelnẽdiã tamo, mudur adodo idim sur difedi di, disin.

⁴⁴Gama Judas ĩ Jesus yaor fiyẽya nẽ uris nigin, idi fadef fiyẽdin: “Tamo aya umã afouf anĩ, ĩ waleg fen, uroug uleg.” ⁴⁵Judas kaisã bagai Jesus wagen ile iron, “Rabi!” Agef fen, umã fiyen. ⁴⁶Tamo idi Jesus ka dife dirounen. ⁴⁷Age dife di, tamo melsã difaren anĩ takam dimig ul feis yale, pris mudur ado nẽ kabĩ tamo weder salõf iran.

^q 14:36 Anĩ nẽ gariya, Aram od bun ‘Dei.’

⁴⁸Jesus iron, “Aya bē tamo gen, ā dimig adodo, seburer adodo, waleyagau fenē usigef de? ⁴⁹Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.” ⁵⁰Age ye di, ganan ditornē diyalelen.

⁵¹Tamo gaū taka, gabar lalau dogol ifonun ī, Jesus dō fen. Sain idi Jesus ka dife di, ⁵²ī gabar inū iraille, gemū iyawon.

Jesus Juda Kaunsel Neid Kot Mala Bun Ifaren

(*Matyu 26:57-68; Luk 22:54, 55, 63-71; Jon 18:13, 14, 19-24*)

⁵³Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen.

⁵⁴Pita Jesus dume dōf, tokō fel ile, pris mudur ado nē fō fofomalan wō yen. An ī kabī tamo geid dibod ken, yā imidirek ibodon.

⁵⁵Pris odudug, kaunsel ganan geid, Jesus laa bun dinenēf nigin bouwa bun od dimiren. Anī ere, taka to dilen. ⁵⁶Musei Jesus bouwa bun idegēya od diraran, anī ere, idi neid od tekelei sā.

⁵⁷Age de fen, tamo tunī fafā de fen, Jesus bouwa bun idegēya od enī diran, ⁵⁸“Amā karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’ ” ⁵⁹Anī ere, idi neid od anīg tekelei sā.

⁶⁰Age de di, pris mudur ado wagedin fā ye ifar fen, Jesus to fiyen, “Ō to solo urōf de? Eī ere od anī tamo enidi dirousi, ō boū bun duk?” ⁶¹Anī ere, Jesus ī mutū ifar fen, to solof iron.

Baban pris mudur adom, ī to fiyen, “Ō Kristus, Negur Naal de?”

⁶²Jesus iron, “Aya im, ā Tamo Naal Negur megeir ado ima biyalem ibod ken, saa lalo bun isi mog, ulogouf.”

⁶³Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban tamirēf? ⁶⁴Ā kono fiya od mogo karī gel. Ā ere kisi gef?”

Idi ganan ī laa fouf nigin diron. ⁶⁵Age de fen, tunī Jesus disisnē, mala difofakel fen, imedim dun. Age de fen, idi diron, “Aim inok kurō weis urō!” Age dife di, kusī tamo Jesus dale fen, dun.

Pita Jesus Nigin Wa Fen

(*Matyu 26:69-75; Luk 22:56-62; Jon 18:15-18, 25-27*)

⁶⁶Pita fō fofomalan tenebur ibod mog, pris mudur ado nē kabī kayau taka isin. ⁶⁷Ī, Pita yā imidir mog, lo fel fen, iron,

“Ōg Jesus Nasaret tamal geiden.”

⁶⁸Anī ere, ī waf fen, iron, “Ō od urok enī, aya keleī sā.” Age ye fen, ī bobogē iyok ilen.

⁶⁹Kabī kayau anī Pita an ile fen, ī baban an difaren anī irokenēdin, “Tamo enī are idi neid taka.” ⁷⁰Ī baban wa fen.

Sain naal ilele di, idi melsā difaren anidim Pita dirokenen, “Momoi bagai, ō idi neid taka, ere nigin, ō Galili tamal.”

⁷¹Ī mogo yogo bouwa geluf fen, total od irokenēdin, “Tamo ā urōgef anī, aya keleī sā.”

⁷²Age ye mog, kaisā bagai, tataro baban kokorok yen. Age fe di, Pita Jesus od irokenen anī weder fokō felen: “Tataro fau kokorok ye uru fiya sā mog, ō aya nigin wa wo, towo wouf.” Anī bunem, ī kusureis fen, inā yalen.

Jesus Pailat Mala Bun Ifaren

(*Matyu 27:1, 2, 11-26; Luk 23:1-5, 13-25; Jon 18:28-19:16*)

15 ¹Bonimei bagai, pris odudug, mudur adodo, lo ifelnēdiya tamo, Juda neid kaunsel ganan geid, od difon. Idi Jesus difō dale dirou, Pailat ima bun dinon.

²Pailat Jesus to fiyen, “Ō Juda neid king de?”

Jesus solof iron, “Are de yer, ō urok anī.”

³Pris odudug ī bouwa bun od musei dun. ⁴Anī nigin, Pailat baban Jesus to fiyen, “Ō to solo wo urōf de? Ereb ererb musei nigin bouwā bun od dinof anī ulef.”

⁵Anī ere, Jesus fau od taka to solo fen. Age fe di, Pailat terē ye fen, kisi musei yalen.

⁶Gawaman nē tobonunā are, Pasa Sifa inoya bun tamo kayau dirō di, kalabus bun tamo taka dalisnēdig. ⁷Tamo taka yana Barabas ī, tamo kusī dales fen, tamo didenkesin, kalabus bun dinenan anidi neid taka. ⁸Tamo kayau mala odug dise, Pailat gai age fedig anī, age fenēdiyof nigin to difiyen.

⁹Pailat to fedin, “Ā aya Juda neid king anī aliskeneīf de?” ¹⁰Pailat keleī, pris odudug idi kiyeī dino fen, Jesus ī ima bun dinon. ¹¹Anī ere, pris odudug tamo kayau waud dale fen, dirokenēdi di, idi Jesus ban Barabas anī Pailatem yaliskēdiyof nigin diron.

¹²Pailat idi to fiyēdin, “Juda neid king gedig anī, aya ī nigin naig afiyēf?”

¹³Idi diweig diron, “Aa tetek bun ūf!”

¹⁴Pailat idi to fiyēdin, “Ere nigin? Ere mosor ī age fen?”

Anī ere, idi total bagai diweig diron, “Aa tetek bun ūf!”

¹⁵Tamo kayau waud el foug nigin, Pailat Barabas yaliskēdin. Pailat irō di, Jesus wagī difiye ken, aa tetek bun dūf nigin, kusī tamo imeid bun inon.

Kusī Tamo Jesus Ketē Difiyen

(*Matyu 27:27-31; Jon 19:2, 3*)

¹⁶Kusī tamo idi, Jesus dale dirou gawaman mudur nē fō aaben dile fen, kusī tamo ganan diweignēdi di, guru difen. ¹⁷Idi gabar

kadaũ difounkenen, age de fen, idi malũ duri ado dale, teter tanak kori de fen, ĩ mudur bun kurũ difen. ¹⁸Age de fen, idi ĩ diweig dirokenen, “O, Juda neid king gai gai ibodõf!” ¹⁹Baba baban idi werĩ tibog nem mudur bun du ken, disisnen. Idi iboreid bobou de, kususu de fen, ketẽ difiyen. ²⁰Idi ketẽ difiye kel fen, gabar kadaũ dinukeis, yogon gabar bagai anĩ difounkenen. Age de fen, idi ĩ aa tetek bun dũf nigin dirou diselen.

Jesus Aa Tetek Bun Dun

(*Matyu 27:32-44; Luk 23:26-43; Jon 19:17-27*)

²¹Tamo taka Sairini tamal, yana Simon, Aleksanda Rufus ado neid temeid, ĩ yogon fonom isi, luwen wal fediyõ mog, idi Jesus nẽ aa tetek faali foug nigin nugo difiyen. ²²Idi Jesus modoũ yana Golgota (anĩ nẽ gariya, Mudur Tuwa nẽ Modoũ) an dirou diselen. ²³Age de fen, idi Jesus darau naal to karĩ youf nigin wain marasin^r taka ado falei de difenen, anĩ ere, ĩ to yon. ²⁴Idi ĩ aa tetek bun du ken, in gabar foi de fen, aibem ereb anĩ yalouf nigin aisai kodẽ den.

²⁵Bonimeĩ nain kilok bun, idi ĩ aa tetek bun dun. ²⁶Jesus bouwa yũya od eig de ditoton: JUDA NEID KING. ²⁷Idi bẽ tamo urug, ĩ geid aa tetek bun didenen, taka Jesus ima biyalẽ, taka ima kilẽ.^s ²⁹Tamo kayau dile disi dife, kono difiye ken, kasã difiyẽ, mudureid dira ken, diron, “Õ, tempel narĩ afel fen, baban naa towo bun anouf, won, ³⁰õ ogo nigin usenne ken, aa tetek bun tamal kutũ weis!”

³¹Age difiyen gen, pris odudug, lo ifelnẽdiya tamo geid, idi dogo dogol wogõ de fen, ĩ ketẽ difiyen. Idi diron, “Ī tunĩ isennẽdidig, anĩ ere, ĩ yogo isennẽya kisi feleya sã! ³²Kristus enĩ, Israel neid King, utornẽg len, gama aa tetek bun tamal kutũ yeis len, tail fen, momoi tauf.” Idi ĩ geid aa tetek bun didenẽdineg, ĩ kono difiyen.

Jesus Laa Fen

(*Matyu 27:45-56; Luk 23:44-49; Jon 19:28-30*)

³³Gaa atun tuwelf kilok bun, gugum isi, teneub ganan kerũ fel ile, tri kilok aragaun. ³⁴Aragau tri kilok bun, Jesus wade bagai iweig iron, “Eloi, Eloi, lama sabaktani?” –ani nẽ gariya, “Neu Negur, neu Negur, ere nigin õ aya utornal?”^t

³⁵Tunĩ melsã difaren, anĩ karĩ de fen, idi diron, “Karĩg, ĩ Eliya iweigne.”

^r 15:23 Marasin nẽ yana, ‘mer (myrrh).’ ^s 15:27 Itotoya tunĩ eig de ditoton: kilẽ. ²⁸ Age de fen, Negur nẽ Itotoya enei kisi felen, “Ī lo difodulẽdig anidi geid bagu difedin.” (Asaia 53:12)

^t 15:34 Sam 22:1

³⁶Tamo taka gudu re ile, spons^u yalen, wain makik ado bun nu feis fen, tibog bun ino fen, Jesus yān nigin ifenen. Agef fen, ī iron, “Gama utornēg. Eliya isi yaleisnē mog, tailauf.”

³⁷Jesus ait odug nem iweig fen, laa fen.

³⁸Tempel nē gabar faraf uru fen, ilunenem irousil teneburen. ³⁹Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, “Momoi bagai, tamo enī Negur Naal!”

⁴⁰Kayau tunī so del difar fen, lo difen. Idi atun, Maria Magdala, taka Maria, Jems naal bagai Joses ado neid sineid, taka Salome. ⁴¹Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

Jesus Mū Difen

(*Matyu 27:57-61; Luk 23:50-56; Jon 19:38-42*)

⁴²Naa are dodok fiya nē naa (naa anī bure fele di, Sabat naa wō youf). Aragau mog, ⁴³Josef, Arimatea tamal, ī kaunsel neid odug taka, ī yogo anī Negur nē tano tari fen, ī kumī sā Pailat garan ile, Jesus bouwa buru yalouf nigin to fiyen. ⁴⁴Pailat Jesus mogo laa fel ya anī karī ye fen, terē yen. Ī kusī tamo neid orowa iweigne ken, Jesus mogo be laa fel anī, ī to fiyen. ⁴⁵Sain ī kusī tamo neid orowa bun laa fel ya karī ye fen, ī Jesus bouwa buru yaleya nigin Josef yo fiyen. ⁴⁶Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ī matmat sa bun ku dalen anī kur inenen. Gama ī meein wele fe di, matmat bobog katī felen. ⁴⁷Maria Magdala, Maria Joses nē sina ado, ī dinenen modou anī dilen.

Jesus Mata Kel Fā Yen

(*Matyu 28:1-8; Luk 24:1-12; Jon 20:1-10*)

16 ¹Sabat naa bure fele di, Maria Magdala, Maria Jems sina, Salome anidim dile, Jesus bouwa bun wā difouf nigin, moul sumeī biya na gei difen. ²Uub nē naa matu bun^v bonimeī bagai, we kurā fel mog, idi matmat bun naab diyok dile fen, ³idi abob to difen, “Aim matmat bobog bun meein wele fel kanadauf?”

⁴Age de fen, meleid diran, idi meein odug biya anī wele feleya dilen. ⁵Idi meku namen dilen, tamo gaū taka gabar lalau ifoukel, ima biya melem ibod mog, dile fen, terē den.

⁶Ī iron, “To terē wog, ā Jesus Nasaret tamal aa tetek bun dun anī umirnēgef. Ī mogo fā yel! Ī ein sā. Idi ī dinenē yenen modou anī uleg. ⁷Anī ere, uleg, in dō fiya tar Pita geid urokenēdig, ‘Ī ketem Galili ilef. An ī ulougouf, ī irokenein kilei.’ ”

^u 15:36 Maaīwō tamal safina taka, ku nanaal musei ado naan dū fedig. ^v 16:2 Are Sande.

⁸Idi terē de fen, waud firagagaũ felen, anĩ nigin, kayau idi ulolō deis, meku ditor diyawon. Idi kumĩ den nigin, aib taka to dirokenen.

[Itotoya tuni kulu bagai od gariya dino fen, ditoton anĩ bun, Mak 16:9-20 to ibodok.]

Jesus Maria Magdala Bun Wō Yen

(Matyu 28:9, 10; Jon 20:11-18)

⁹Jesus, uub nē naa matu bun bonimei bagai, fā ye fen, ĩ Maria Magdala bun ketem wō yen, kulu Jesus kaa sesen sewen kayau anĩ bun irudin.

¹⁰Ī ile, idi Jesus geid diyon anidi, waud gudūf fen, marudim difen anĩ irokenēdin. ¹¹Idi, Jesus mata fā yel, kayau ĩ ilel ya anĩ karĩ de fen, waud to momoi den.

¹²Dum in dō fiya tar uru naab diyok dile mog, Jesus bouwa fire bunem, idi atun wō yen. ¹³Age fe di, idi keku de disi, an difaren anidi dirokenēdin, anĩ ere, idi nigineg to momoi den.

¹⁴Dum idi llewen, saaf doko dibod mog, Jesus idi bun wō ye fen, ou fiyēdin, ere nigin, idi Jesus fā yel mog, dilen anĩ to momoi de fen, waud katĩ difelen nigin.

¹⁵Jesus irokenēdin, “Ā teneub ganan bun uleg fen, biya od tamo kayau ganan urokenēdig. ¹⁶Taka ĩ momoi ye fen, naan yalef are, ĩ kel yalouf, taka ĩ to momoi yef are, es fiya bun inenēf. ¹⁷Momoi def idi, uris enidi idi bun wō youf, idi aya yanau nem kaa sesen dirudiyouf, idi od mata mata wogō douf. ¹⁸Idi imedim gogour dale diroudiyouf, takag, laa nē mū sane dāf, to mū idenēdiyof, takag, idi dagi tamo bun imeid dino di, dagi sa kalauf.”

Jesus Saa Ilun Irou Iselen

(Luk 24:50-53; Aposel 1:9-11)

¹⁹Odug Jesus irokeneid bure fele di, Negur Jesus yale, saa ilun irou isel, Negur ima biyalē ibodok. ²⁰Anĩ nigin, in dō fiya tar dile, teneub ganan bun biya od wogō den. Age dife di, Odug idi ado kabĩ yale di, uris bunem yogon od anĩ megeir fen.